

ქართული გზები



საქართველოს
შენიშნული
კავშირის
გაზეთი
№1 (304)

1-31 იანვარი
2024

ფასი 150 ლარი

გაეროს
თემატიკა



ბალათერ არაბული

ზამთრის პირის ესკიზებიდან N-ს

...ცაზე ილევა მთვარე-იელი და შავი ღამე გვეშლება თავზე, შენ ასე ნაზი და მშვენიერი ამ დამლულ დღეებს სინათლით ავსებ... მთებზე ზის თეთრი ფრინველი თოვლის და ნისლის ფრთებით იფარავს სახეს; ქარს მოყოლილი შენ ხარ ფოთოლი და ფოთოლივით თრთი და ცახცახებ... ჩამოაქვთ ზეცა დეკემბრის ავდრებს და ზამთრისპირის ქარები ქრიან; ან მე მოვედი ამ ქვეყნად ადრე, ანდა შენ გაჩნდი ძალიან გვიან...

...ცაზე ილევა მთვარე - იელი და შავი ღამე გვეშლება თავზე, შენ ასე ნაზი და მშვენიერი ამ დამლულ დღეებს სინათლით ავსებ!..

შეხვედრა N-ს

...თითქოს დამთავრდა გრძელი ზღაპარი,- თქვენ ახლა გქვიათ ტკბილი ბებიას, ჭალარა თმები ჩამოაფარეთ გარდასულ დღეებს ტკივილებიანს და სევდიან წლებს, სადაც მარტოდენ სივრცეს ავსებდა ქარი ხენეში; თქვენ მშვენიერი ხართ ქალბატონი, შემოპარული ამ სიბერეში...

სიზმრების ქვეყანა

... ჩვენ დღისით, მზისით ვხედავთ ჭრელ სიზმრებს, როგორც ბურანში, ახლა ისე ვართ; ჩვენ გ ვ ღ ვ ი ძ ა ვ ს, მაგრამ ყოველდღე ისევ უ ც ხ ო სიზმრები კვლავ გ ვ ე ს ი ზ მ რ ე ბ ა... ათოვს ხეობას და ათოვს კორომს და მდუმარება ანევის ტყის პირებს;

ჩვენ კი კვლავ ლამაზ ს ი ზ მ რ ე ბ შ ი ვ ც ხ ო ვ რ ო ბ თ, სად გაზაფხული მწვანედ ბიბინებს... შორით დაღლილი მყინვარი გვიმზერს, ჭალები ზამთრის ნისლით ივსება; ჩვენ კი...

მ ზ ი თ ა ვ ს ი ლ ს ვ ხ ე დ ა ვ თ ჭ რ ე ლ ს ი ზ მ რ ე ბ ს, უ ც ხ ო ს ი ზ მ რ ე ბ ი კ ვ ლ ა ვ გ ვ ე ს ი ზ მ რ ე ბ ა...

ზამთრის პირის ესკიზებიდან

... ვინ გაგიყვანათ, მინდვრებო, ქარში? ვინ დაგათოვავთ თრთვილის ქვირითი? შემოდით ჩემთან, ლოგინს გაგიშლით გაზაფხულამდე, ტკბილი ძილისთვის... და თქვენც, ხეებო, რომ განევთ სევდა და სუსტი ტანი გიჩანთ შიშველი, შემოდით ჩემთან, შემოდით ჩემთან, ყველას უკლებლივ გეპატიჟებით...

საქართველოს

... არეულია კეთილ-ბოროტი,- გაუტანლობით, შურით, ლალატივ; ველარ ვიცხოვრებთ, როგორც ვ ც ხ ო ვ რ ო ბ დ ი თ, ვ ე ლ ა რ დ ა ვ მ ა ლ ა ვ თ, რ ა ს ა ც ვ მ ა ლ ა ვ დ ი თ... დღევანდელ დღისთვის პასუხს ვინ აგებს?

ან მომავლისგან მაინც რას ელი? მტრის ალყაშია ციხე-სიმაგრეც და მეციხოვნეც უკანასკნელი... არც გამკითხავი და არც გამგები, არც მტრის დამხვედრი არავინ არ ჩანს,-

შენი კოშკები ბროლით ნაგები გზად მოთარეშე ყაჩაღებს დარჩათ... უელავს ღამეს მთვარის ნისკარტი, ცა გადამლილა ულურჯეს მინდვრად, მე კვლავ მიყვარხარ, როგორც მიყვარდი, ასე დიადი და ასე წმინდა...

თავის დარდისთვის მოუცლელი...

...უფროსი ვაჟის საქორნილოდ ლუდი ადულა გამახელამ, არაყიც ბევრი გამახადა და ქვაბ-ჭურჭელი ამოავსო წინ-წარაქლებით...

სამ დღეს ფქვავდა გამახელა სალუდე ხორბალს, სამ დღეს ცხენ-ჯორით ჭალაშით ზიდავდა ნაფქვავს და მზის სხივი დასთამაშებდა ბოროლას მწვერვალს...

შვიდი დღის თავზე საქორნილოდ უხმო თემ-სოფელთ: გაღმელთ-გამოდმელთ, პირიქითელთ და პირაქეთელთ, სისხლ-ხორცით თავის ბიძაშვილებს და ნათესავ-მოკეთებებს მთაში თუ ბარში...

მაგრამ, თურმე, ეშმას არ სძინავ, სუ იმას ფიქრობს: ვის რა ავნას, რა უხიმანას, ვის დღე უქციას უკუნ ღამედ, ვის ლხინ-სიმწარედ...

გამახელასაც ვერე მაექც, შავ დღე დაუყენ — უფროსი ვაჟის მექორნილეთ როცა მაელოდ, უმცროსა ვაჟი, დილისპირზე, მტრებისაგან მაკლულ მაჰგვარეს...

ძალიან შანუხდ გამახელა, ბევრი იქუნა, ჭერხობი ჩუმად ივიშვიშა, თავ კედელს ურტყა — ყველა სიმწარეს იფიქრებდა, ამას კი ვერა, მაგრამ ახლა რაღას იზამდა, სტუმრები უკვე, საცა იყო, მაადგებოდეს — ლხინ-ქორნილში დაპატიჟებულთ მოთქმა-ტირილს ვერ დაახვედრებდ, იმათ სიხარულს ვერ გაუმწარებდ და მოქვითინე თავის დიაცს შაუძახა გასამაგრებლად: — გეყოფის, ქალო, ეგ გოღება, მაგის დრო არ გვაქვ, ეს ამბავ ახლა სოფელშია ც არვინ გაიგას, ლხინზე მამავალ სტუმარ-მამსვლელ ჩვენი დარდით არ შავანუხათ, ქორნილ მიღებულ წეს-ადათით უნდა ჩატარდას, მემრე კი, მემრე, ჩემო დიაცო, დავჯდათ და ერთად დავიტირათ ჩვენი ვაჟი, მტრების ტყვიისგან გულგანგმირული... შენც დადეგ, მზეო, და დაგვიანდი, შვილი ეყრება დედ-მამათა... ორ დღეს ისმოდა საქორნილო ტამ-ფანდურის ხმა, ორ დღეს მღეროდა გამახელა თავის მძახლებთან, ორ დღეს ილხენდნენ მექორნილენიც...

მესამე დღეს კი, როს სტუმრები მიეფარნენ ხეობის ბოლოს, გამახელაის მოთქმა-გოდებამ შასძრა სოფელი...

მხოლოდ მერეა მოიცალა გამახელამ თავის დარდისთვის...

მესამე დღეს კი, როს სტუმრები მიეფარნენ ხეობის ბოლოს, გამახელაის მოთქმა-გოდებამ შასძრა სოფელი...

მხოლოდ მერეა მოიცალა გამახელამ თავის დარდისთვის...

მოსისხლეები

...შატილივინების კაც ჰყოლივას ღილღველებს მაკლული და შინშის სისხლის ასალებად ლეკო ქისტეთს მარტუა წასულ... და მთელ აულში გამორჩეულ მოსისხლის სახლს მისდგომივ ღამით... ბანზე მძინარ გაუყოჭავის და ფეხშიშველა წინ წამაუგდავ...

ქვა-ლორღზე მავალს ფეხისგულეზ გადასტყავებოვ და სისხლმდინარს კოჭლობით უვლავ... შასცოდებოვ მოსისხლე ლეკოს: — ვაჟკაცს ღირსება ელახებოვ! გაუხდავ თავის ქალამნები და იმისად ჩაუცმევავის...

აეგრ მასულან დილისპირს შატილ, — ლეკო — ფეხშიშველი, იმის მტერ კი — ქალამნებჩაცმული...

ბუბა

...დათვისელ ბუბას შვილ მახკდომივ — მწყემსობისას, სოფლის ჭალაზე წყალს დაუხრჩავის...

მწარედ უგლოვავ საწყალ ბუბას თავის ყმანვილზე: თმან დაუჭრიან, სახე-თორპილნ დაუქანრიან, ზედ დარდისა დაუტირებავ: — ნეტავ სიკვდილსამც მისცა შვილიო, იმის შვილს სხვა სიკვდილ შამაჰყარაო, მემრ გაიგებდა ის სიკვდილი ჩემს სიმწარესო... და იმ დღიდან წყლის შასმაზე უარ უთქვამ:

— მაგან ბეჩავა შვილ მამიკლავ, ცოდვა დაიდვავ, ცოდვიან წყალს კი მე ვერ შავსომავ!..

„სხვას კი რას გამაგაჯავრებ, წყალო, არ შავსომ, ტიალო!..“

„... ნისლო, მთით გადმომავალო,“ უთქმელო დარდო მთებისა, რა ამბავია ხევსურეთ, ახალ რაი-რა ხდებოვა? დამხვედრი მტერ-მოყვრისადა ვაჟკაც ხვარავინ ჩნდებოვა ანდა თემ-სოფლის შამრცხვენი უსახელოდ ვინ კვდებოვა, საკარგემო ვისა ისმების, იქნება, არც ისმებისა?..

... ნისლო, მთით გადმომავალო, უთქმელო დარდო მთებისა...



თეიმურაზ ლანჩავა

ჰვირვასო თამურ!

ამ და ბოლო დროს დაწერილი სხვა მშვენიერი ლექსებისათვის დაგაჯილდოვებთ გალაკტიონ ტაბიძის ოქროს მედლით.

ერთხელ კიდევ გილოცავთ ამ დამსახურებულ ჯილდოს.

რევან მიშველაძე

საათი წუთებს რომ ვერ თვლის, მაჯას შევაბი, გაჩერდა, არ წიკნიკებდა ყოველთვის, უსაქმურობას მაჩვენებდა. ისეთ დროს გამაღვიძებდა, რომ უნდა დამძინებოდა, დროს მახსენებდა საშინელს, გული რომ დამძიმებოდა. ვთქვი, მოვიშორებ, მოვიხსნი, მივხვდი რომ არასანდოა, მაგრამ დროს როგორ მოისვრი, მითუმეტეს თუ სხვა დროა. დაფრერებვიარ, მაკვირვებს, სხვა დროა, სულ სხვას აჩვენებს, ჩემს გაგიჟებას აპირებს და გულისცემას აჩერებს.

ათამაშებენ ლომების როლში, ახლა წრუნუნებს, ნამდვილი ლომი, დროს-რეჟისორს ხედვას უწუნებს. ნამდვილი ლომი მოღრიალე, ლომი ნამდვილი, ხვდება არაა დღეს ამ დროში მისი ადგილი. დუმს არ ღრიალებს, არსებობას არ აღიარებს და ყველა ხედავს დროს დუმილით ანაგვიანებს.

მიტოვებული სანოლი რკინის და უცნაური სიკვდილის განცდა, მწარე სიმართლედ მოედო თბილისს და სიმარტოვის მოლოდინს გასცდა. ცისკენ გაფრენას გავდა სიკვდილი მარადისობის ვნების აშვებით, უცებ აივსო მთელი ქვეყანა თვალცრემლიანი დიდი ბავშვებით. არ იყო მინა მისთვის სიმშვიდე, იყო საჭირო ღმერთამდე მისვლა, წავიდა, დათმო, ერთადერთობა, უიმედობა იმედით იხსნა.

ლიმილი დაკარგეს ბავშვებმა, ეძება დრომ, ველარ მონახა, ინყება ზეციდან დაშვება და ხვდება, რომ მინის მონა ხარ. გაძნელდა ყოფნა და არყოფნა, თვალეები ემღვრევა სიმშვიდეს, ძნელდება დღე ღამის გაყოფა, არყოფნა სიკვდილის წილში დევს. თანდათან იმსხვრევა სიზმარი დრო კვდება, ტკივილებს გადამდებს და ფერფლად იქცევა მიზანი მიზანის არყოფნა გადარდება. ლიმილი დაკარგეს ბავშვებმა, ეძება დრომ ველარ მონახა, ინყება ზეციდან დაშვება და ხვდება რომ მინის მონახარ.

ყველა ზამთარში თოვლი თეთრია, სხვა ფერებზე რომ არ ქორწინდება, თოვლის სითეთრე ერთადერთია, არასოდეს რომ არ მოგწყინდება. რაც სპეციაკია და მსუბუქია პეპელასავით თეთრად ფარფატებს, მიუნწვდომლობა არის ზამთარი, რომ მოინდომეს და ვერ დახატეს. შენს ნაფეხურებს დავეძებ თოვლში, რომ მომიყვანოს თოვლმა შენამდე, ვარ განზილებულ მეძებრის როლში ერთინაბიჯი მრჩება შველაამდე.

ნიშნად იმის, რომ ნამდვილად ლომი იყო, გალიაში ჰყავდათ, დიდხანს ღრიალებდა, პასუხობდა, თავზარდამცემ ყველა კითხვას, „დანაშაულს“ მაინც არ აღიარებდა.

დაუთვალეს ჩადენილი ცოდვა-მადლი, მის სარდლობით თუ რამდენი ომი იყო, ერთადერთი ანუხებდა, კლავდა დარდი, დაივინყეს, რომ ნამდვილად ლომი იყო. დრომ სიმშვიდეს შეაგუა, მიაჩვია, მშვიდად ისმენს განაჩენს და არ აკვირებს, ყველაფერი სისულელედ მიაჩნია, გალიიდან არსად წასვლას არ აპირებს. თუ მოკვდება, უნდა სამშობლოში მოკვდეს, არ ადარდებას სანუხარი დანარჩენი, თუ მოკვდება სამშობლოში, სხვაგან არსად, სამშობლოა მისი ბოლო განაჩენი.

ჩემი ბავშვობა ქუჩაში დარჩა, მოგონებებად შემორჩა უბანს, დავეძებ ახლა და თვალეებს ვქაჩავ, მაინტერესებს როგორმე თუ მგავს. წუხს მონატრება, წარსულში ვეძებ იმას, რაც დროში დავკარგე ერთ დროს, დაფიქრებული საკუთარ ბედზე ვუხმობ დაბრუნდეს, როგორმე მენდოს. ასაკი იქცა ამინდის მონად, და ღრუბლიანი ზეცა მახურავს, რატომღაც მჯერა, ხელახლა მოვალ, მტრედებს წავართმევ სახლის სახურავს. დავუსტვენ ისევ, იქნებ სახლიდან, გამოვიტყვილო ის ვინც მრიყავდა, მჯერა, რომ ისევ ერთგული ვრჩები, ვინც ბავშვობაში მართლა მიყვარდა. ჩემი ბავშვობა ქუჩაში დარჩა, სხვისი ჩრდილივით, დაუნახავი, ვით ბავშვობაში ნანახი ყანჩა, შენით მოკლული, დაუმარხავი.

გამოვეპარე ძილიდან სიზმარს, ახლა სიზმარი ცხადში გრძელდება, გადმოვაბიჯე თამამად იმ ზღვარს, უარყოფა რომ გამიძნელდება. ვცხოვრობ სიზმარში, ვარსებობ ცხადში, და ვითვლი წუთებს, მინდა გავერთო, და ვხვდები ჩემში ცხადსა და სიზმარს, მოუნახიათ რალაც საერთო.

ვიცი ბოლოს აღარვინ შემრჩება, მოყვარული, მოტრფიალე, წრფელი, შენც წამიხვალ, მიმატოვებ, შენ ჩემო და ჩამოთოვს სევდას ძველი წელი. ვიცი ბოლოს, ვინც მიყვარდა, გამწირავს,



ამატირებს მარტოობის შიში, უნდა ქოლგა შევაშველო ამ წვიმას, გაზაფხული დავისიზმრო ძილში. ვიცი, ვიცი, არაფერიც არ ვიცი, და განვიცდი, რომ არ ვიცი, იმას, თუ ისურვებ, სიკვდილამდე დაგიცდი, მერე რაა, რომ სიზმარშიაც მძინავს. დგანან წყნარად მოწყენილი ლანდები, ვარ მორჩილი შენი ტყვე ვარ, გბარდები, შენც რომ დამთმო, თვალთახედვას გაექცე, უეჭველად ცაში გადავბარდები.

მარტს ემსგავსება ხანდახან გული წვიმებით, ცივი ხასიათებით, ცხოვრება ხდება მწარე და რთული, შეუცნობლობით ვხასიათებდი. ნაიყოლიეს ცივმა ქარებმა, სითბო, სიმხნევე, დროის სინაზე, გაახმაურეს ჭორად ქალებმა, ჩემდამი ტრფობა მტრების ჯინაზე, მარტს ემსგავსება თანდათან გული, და ყველაფერი ხდება მარტივად, ჩემს სიმარტოვებს ცრემლებით ვუვლი, და გულს რომელიც თქვენ რომ არ გტკივთ.

გალამაზდა სიკვდილი, ყვავილებით შემოსეს, მომლიმარი ხვდებიან, გამსვლელსა და შემომსვლელს. სხედან ჭირისუფლები, თითქმის აღარ ტირიან, ხვდები სიკვდილ-სიცოცხლე უკვე რა მარტივია. ყვავილები საბრალო ვალს იხდიან უბრალოდ, კრძალვით გაყურადებენ თქვენს სატიკვარს თუ „გალობთ“. გალამაზდა სიკვდილი, ყვავილებით შემოსეს, მომლიმარი ხვდებიან, გამსვლელსა და შემომსვლელს.

შენ ჩემი შუქნიშანი ხარ,
 მარადიული ნათებით,
 მუდამ ერთმანეთს დავეძებთ
 სხვადასხვა მისამართებით.
 შენ ჩემი შუქნიშანი ხარ,
 დაგინახავ და ვჩერდები,
 დამინახავ და ნითლდები
 და გალიმებას მჯერდები,
 მერე სად წავალ არ ვიცი,
 როცა შენ არ გამინათებ,
 როცა შენ აღარ დამიცდი,
 როცა შენ არ გამიმართლებ.

გარეთ თოვლია, სითეთრე მოსავს
 ყველაფერს, რასაც თვალთ უცქერი
 და ელავს თოვლი, როგორც ულექსოდ,
 შემორჩენილი თეთრი ფურცელი.
 მოვა ვილაცა, ფეხებით დანერს
 თოვლზე სტრიქონებს,
 დაკეტილ კართან,
 შეგვეხარბება, რადგანაც ამ წელს
 თოვლში მიგვასწრო საყვარელ ქალთან.
 შეგვეხარბება, რომ უჩვენობით
 დღე აცახცახდა, გაფითრდა თრთოლვით,
 რომ ჩვენზე ადრე დრომ იზეიმა,
 ყოფნა იმედით, ქალით და თოვლით.

ხატავდა, გვჩუქნიდა, უხაროდა,
 ტკივილი სევდაში გვპატიჟებდა,
 სამშობლოს ტკივილით მწუხარობდა,
 ტკივილის მოთმენით გვაგიჟებდა.
 თან ახლდა სინრფელე არნახული,
 სინათლეს ტოვებდა გაცივებით,
 ღიმილში ჭარბობდა გაზაფხული,
 საკუთარ ტკივილთა დამცირებით.
 და როცა ზამთარი ჩაუსახლდა,
 არჩია გაძლება მდუმარებით
 და როცა სიკვდილი ჩაუსაფრდა
 მოიხმო ღვთიური მკურნალები.
 ვერ შესძლო მუდმივად გადარჩენა,
 ნავიდა მდუმარედ, განგვერიდა
 და წასვლით ჩვენც წასვლა აგვარემა,
 ითხოვა პატივი განგებიდან.
 შემოგვრჩა ღიმილი ფერწასული
 სურვილი ჩარჩოში არდარჩენის,
 ნავიდა, დატოვა მოგონება,
 სურვილი სულიერ გადარჩენის.
 ხატავდა, გვჩუქნიდა, უხაროდა,
 მღეროდა სევდაში გვპატიჟებდა,
 სამშობლოს ტკივილით მწუხარობდა,
 ტკივილის მოთმენით გვაგიჟებდა.

ვილაცა დარდის ღრუბლებზე დადის
 და ნანილდება დარდი წვიმებად,
 თქვენ ნანილი ხართ წვიმიან ამ დღის,
 გაავდარდებით, ნუ გენყინებათ.
 თუმცა სისველე განწყობას ვერ ცვლის,
 ისვენებ, ცისკენ გიჭირავს თვალი,
 დროებითია ჭიკჭიკი მერცხლის,
 დროებითია ფერები მკრთალი.
 გამოიდარებს და ჩვენს სიშიშვლეს
 ზღვა ნაშლის, აქცევს ცისფერ ტალღებად,
 მომხიბვლელობა მაჩუქეთ ამდღის
 დროებითობა არ გენალვლებათ.
 ვეძებთ ერთმანეთს, დღითა და ღამით,
 რაკი ერთმანეთს ვნახულობთ ვხარობთ,
 ვართ ბედნიერი პატარა რამით,
 არგვაქვს უფლება არ გავიხაროთ.
 დამშვიდობების დადგება ჟამი,
 დამეთანხმებით, რომ კიარ ხუმრობთ,
 თქვენ მოისურვეთ, რომ გამიხსენოთ
 რომ გამახაროთ და მინახულოთ.

სენსაცია ბატონებო, ინტერესნი სენსაცია,
 ჩემნაირი ფეხსაცმელი,
 ქუთაისში ბევრს აცვია.
 მე რომ ჭრელი პიჯაკი მაქვს,
 ცისფერი და ოდნავ ვინრო,
 მამაჩემის ნაქონია,
 შემიძლია დავიფიცო.
 როგორც იქნა მოვალნიე,
 თქვენამდე რომ დაგენახოთ,
 ახალ წლიდან ტკივილები,
 ჭირთან ერთად დაგემარხოთ,
 მოგიტანეთ სურვილები,
 ჩემი ფიქრის, ჩემი დარდის,
 ჩემი თავით გეახელით,
 ბევრი სხვისი თავით დადის.
 ახმოვანებს ბევრი სათქმელს,
 თავის სათქმელს ახმაურებს,
 რომ გგონიათ დაჭკვიანდა,
 დააკვირდით, ახლა ურევს.
 ვარ მეკვლე და მოსინათლე,
 ქალაქის და ჩემი ქუჩის,
 მოვალე ვარ ვთქვა სიმართლე,
 ჩემს ქვეყანას როცა უჭირს,
 სენსაცია ბატონებო,
 უშურველი სენსაცია,
 მე გამხადეს, სხვას ჩააცვეს,
 ჩემი კარგი სხვას აცვია.
 როცა შენი სამშობლო გაქვს,
 ვერ შეიძლებ არ გიყვარდეს,
 გაგამრავლოთ სიყვარული,
 საქართველო აგვიყვავდეს.


მომიკითხე იმერეთი,
 ქუთაისი მომიკითხე,
 სამოთხეა კიდევ ერთი,
 რატომ მიყვარს, მოდი, მკითხე.
 როინს ნუ ამიმღვრევ წვიმით,
 კალმახები დამითვალე,
 შავი ძროხის თეთრი ყველი,
 იმერულად დამითალე.
 ნუ მოყვები რა გსურს, რა ხარ,
 ვინ ხარ, შუბლზე განერია,
 ნაგებულის მოგება ხარ,
 პასპორტში რომ არ წერია.
 დრო თვალეში იკითხება,
 და უღვაში გიგავს წვერას,
 არასოდეს შეაგინო,
 იღბალსა და ბედისწერას.
 მიმოკითხე იმერეთი,
 ქუთაისი მომენატრა,
 სათვალავში კიდევ ერთი,
 საფიცარი მომემატა.
 უჩემოდაც ბრძანე რაც გსურს,
 ვინც გინდოდეს, დამილოცე,
 გარდაცვლილი რომ ჰგონიათ.
 ჭიქა ღვინით გამიცოცხლე.
 შათირიშვილს შეეშველეთ,
 სახლში თავის მიტანაში,
 საარსებოდ ცოტა ფული,
 ჩაუკუჭეთ გიტარაში.
 ვინც დუმს, ისიც აამღეროს,
 იმერეთში არ ტირიან,
 ჰოდა, სადაც არ ტირიან,
 იარსებო მარტივია.
 ბევრი შეყვარებული მყავს,
 ქუთაისი პირველია,
 იმერეთი რომ მიყვარდეს,
 ნეტა რა საკვირველია.
 მომიკითხე იმერეთი...

გავისუსე უკვდავების შიშით,
 მომიტანეს ყვავილები უხვად,
 შენი მზერა მომელანდა ძილში,
 ჩურჩულებდი სიკვდილივით მძულხარ.
 შევიგრძენი სიყვარულის ძალა,
 გამქრალიყო, ნაეშალა დრო ჟამს,
 შერჩენოდა გაცრეცილი ფერი
 დრო და ჟამით გახუნებულ დროშას.
 ჩემს სამარეს დავცქეროდი ციდან,
 ვრწყავდი ვარდებს ამღვრეული ცრემლით
 და ვტკბებოდი თითქოს წყნარად ცრიდა,
 ივსებოდა მინა ვარსკვლავთცვენით.

ლამაზი ქალისთვის ვანვალე,
 უძილოდ დაველი თვალებსა,
 ვარსკვლავებს გავანაწყენებ,
 გადავიკიდებ მთვარესა.
 რკინის კარს შევხსნი ანჯამებს,
 ცრემლით დავალბობ რკინასა,
 სხვა რამე უფრო მაჯავრებს,
 უჩემოდ როგორ გძინავსა.
 სიზმარსაც გავანაწყენებ,
 ვანანებ ღამით მოსვლასა,
 დარდს შეგყრი, აგათვალცრემლებ,
 ცრემლებით რწყავდე მგოსანსა.
 ლამაზი ქალის გულისთვის...
 თვალს ვაიძულებ გიცქერდე,
 იმასაც გაპატივებდი,
 სიკვდილს სურვილით მიმცემდე.

წავართვი სხეულს გული და ვისვრი,
 არაა ღირსი სხეულში დარჩეს,
 ვისვრი იმიტომ, რომ ტკივილს ვიხსნი
 და უგულობა ცხოვრებას მაჩვენებს.
 მაგრამ ვინაა ის ვისაც ვენდე
 და ჩემი გული წაიღო განძად,
 ყოველდღე ვფიქრობ ამაზე დღემდე,
 უგულობაში დროებას ვბაძავ.
 ვინაა ვფიქრობ, ვითმენ და ვშიშობ,
 ჩნდება იმედი და ნათელს მაცმევს,
 ზეციურია შიშველი პირმშო,
 რომელსაც ძალუძს უტიფრად გამცეს
 ღმერთია, სიტყვა რომელიც ვერ ვთქვი
 ვერ გავავიწყე ჩემი ხმა გამჩენს.

ვინ დამინგრია გელათი,
 ანდა ახალს ვინ მიშენებს,
 გასაჭირშია ყელამდი,
 ყვირის ტაძარი: მიშველეთ!
 ქართველ მეფეთა საძვალეს
 ცრემლები დასდის ბზარიდან
 დამეხმარეთო გვაძალებს,
 ტკივილი ჟონავს ზარიდან.
 შემოსცხე, ძმაო შემოსცხე!
 ცაში გაკიდულ მაგ ზარებს,
 განყალბულმა, ცრემლებმა
 ტაძრის კედლები დაბზარეს.



თემურ ჩალაბაშვილი

თანამედროვე ქართულმა მწერლობამ უმძიმესი დანაკლისი განიცადა. გარდაიცვალა გამოჩენილი ქართველი მწერალი და საზოგადო მოღვაწე თემურ ბეჟანის ძე ჩალაბაშვილი.

ზეციური საქართველოს მკვიდრთა შეუერთდა კიდევ ერთი დიდებული შემოქმედი, რომელსაც არასდროს არ უღალატია იმ დიადი ცნებებისთვის, რომლებიც ილია ჭავჭავაძემ - ილია მართლმად საამოქმედო ორიენტირებად დაუტოვა შთამომავალთ - მამული, ენა, სარწმუნოება.

თემურ ჩალაბაშვილი დაიბადა 1951 წლის 12 ნოემბერს სიღნაღის რაიონის სოფელ ძველ ანაგაში. საშუალო განათლების მიღების შემდეგ სწავლა განაგრძო თბილისის ახელმწიფო უნივერსიტეტის ფილოლოგიის ფაკულტეტზე, რომელიც 1976 წელს დაასრულა.

თემურ ჩალაბაშვილმა საინტერესო ცხოვრებისეული გზა განვლო. სხვადასხვა დროს მუშაობდა თბილისის სახელმწიფო უნივერსიტეტის სტამბის მუშად, საქართველოს ბეჭდვითი სიტყვის სახელმწიფო კომიტეტის წამყვან რედაქტორად, გამომცემლობა „მერანის“ განყოფილების გამგედ, თსუ შურნალისტიკის სამეცნიერო ლაბორატორიის მეცნიერ-მუშაკად, საქართველოს მწერალთა კავშირის თავმჯდომარედ, საქართველოს მწერალთა კავშირის ბოლო ყრილობაზე კი თანათავმჯდომარედ აირჩიეს. ამ თანამდებობაზე იგი სიცოცხლის ბოლომდე იღვწოდა და თანამოძმეთ სათნოების, კეთილშობილების, მოყვასის უანგარო სიყვარულის უებრო მაგალითებს აძლევდა.

თემურ ჩალაბაშვილის სამწერლო კურთხევა 1971 წელს შედგა, როდესაც სრულიად ჭაბუკმა ჟურნალ „დროშაში“ გამოაქვეყნა მისი პირველი ლექსები.

მას შემდეგ თემურ ჩალაბაშვილის ნაწარმოებები - ლექსები, ნოველები, ლიტერატურული წერილები, ჩანახატები, მოგონებები სისტემატურად ქვეყნდებოდა ქართულ სალიტერატურო ჟურნალ-გაზეთებში, გამოდიოდა ცალკე წიგნებად.

თემურ ჩალაბაშვილის პოეტური კრებულები „მზე მამულის კვამლში“, „წვა შეგიძლია“, „პოეტის ასი ლექსი“, „ატირეთ წვიმები“, „საუბარი გულთნ“, „ჟამსა უჟამოსა“ შეიყვარა და გაითავისა ქართველმა მკითხველმა, შეიყვარა თუნდაც იმიტომ, რომ ამ კრებულების

ლირიკული გმირი ერთი უბრალო ღამის მეხრე თუ გუთნისდედაა, ღამის ყველასა და ყველაფრისადმი რწმენა-დაკარგული და გულგატეხილი, ერთადერთ იმედად რომ ის ხარები დარჩენია, საუკუნეების უღრანებიდან რქებზე სანთელდანიებულნი რომ მოისწრაფვიან ჩვენკენ და გვაფრთხილებენ, თუკი არსებობა გნადიათ, მაცხოვარის მადლსა და მირონს არ უღალატოთო... დიახ, რაზეც არ უნდა ენერა თემურ ჩალაბაშვილს, დედის დაშარულ ხელებსა თუ შუშანიკ დედოფლის დილეგში შეღწეულ ათინათზე, ჰამლეტ გონაშვილის ხმის მინანქრებსა თუ მარიკა ჩიქოვანის იგავმიუნვდომელ სიყვარულის ნიჭზე, ყველგან და ყოველთვის სიმართლისა და სამართლიანობის ზარებს არისხებდა. მას ხომ ქუჩაში მოკლული ბებერი ძაღლის დატირება შეეძლო, რადგან ეს საზარელი აქტი მისთვის კაცთა ერთგულების დასჯას ნააგავდა. ის პოეტი იყო, გაზაფხულივით რომ ივსებოდა შემოდგომის სევდიანი ფერადებით, თოლიას ნააგავდა, დალილსა და გათანგულ თოლიას, ზღვის უკიდევანობაში გამომწყვდეულს, მას ხომ პაპის დაკოწრილი და ნაჯაფარი ხელისგული საქართველოს რუკას აგონებდა, დაჩეხილსა და დამცრობილ რუკას...

თემურ ჩალაბაშვილის ლექსი, შუშანიკ დედოფალს რომ მიუძღვნა, ოქრომკედით ამოიქარგა მენამულ ხავერდზე და ახლა მეტეხის ტაძარში საქართველოსთვის წამებული დედოფლის საფლავს ამშვენებს. პოეტის ლექსზე „ჩემო საქართველოვ, მართლმადიდებელი“ შექმნილ ჰიმნს საქართველოს სულიერმა მწყემსმა ილია მეორემ მართლმადიდებლობის სიმღერას უწოდა, ხოლო ლექსი „სანთელი“ თავად იქცა რელიგიურ სიმინდედ...

თემურ ჩალაბაშვილის კალამს ეკუთვნოდა არაერთი ნოველა და პუბლიცისტური სტატია; იგი მრავალი წიგნის რედაქტორი და წინასიტყვაობის ავტორი იყო.

თემურ ჩალაბაშვილის შემოქმედების საუკეთესო ნიმუშები თარგმნილია აზერბაიჯანულ, სომხურ, ოსურ, რუსულ ენებზე.

პოეტის მრავალწლიანი შემოქმედებითი თუ საზოგადოებრივი მოღვაწეობა ღირსეულად დაფასდა. მინიჭებული ჰქონდა დავით აღმაშენებლის, ილია ჭავჭავაძის, ივანე მაჩაბლის, ვაჟა-ფშაველას, გალაკტიონ ტაბიძის, ლევან გოთუას სახელობის, „საგურამოს“ და „მუზას“ პრემიები, დავით აღმაშენებლის სახელობის უნივერსიტეტის საპატიო პროფესორის, ქართული პოეზიის რაინდის, საქართველოს დამსახურებული ჟურნალისტიკის ნოდებები, არჩეული იყო თბილისის საპატიო მოქალაქედ...

ნოემბერში დაბადებულს ჟამსა უჟამოსა მიმინოსავით დააცხრა თავს დეკემბრის ალენილი ქარები და თან გაიყოლა სული მისი - თეთრი მოცხარი...

ქართველ მწერლებს, მისი პოეზიის თავყვანისმცემლებს ისლა დაგვრჩენია, რომ დიდხანს, ძალიან დიდხანს გვახსოვდეს სამშობლოს მსახურებაში ბოლომდე ჩაფერფლილი შემოქმედი და მამულიშვილი.

საქართველოს მწერალთა კავშირი



სანთელივით ჩაიღვანა

იგი გამორჩეული პოეტი იყო და ქართველ მწერალთა ოჯახის ერთი ხელმძღვანელთაგანი.

უანგარო პიროვნება, მლმობელი გულის პატრონი და გარემოებისგან დაჩაგრულის ქომაგ-მფარველი გახლდათ. ოცნებობდა განენილი საქართველოს გამთლიანებაზე.

ოცნებობდა დროზე, როცა საქართველოში ის ხელისუფლება მოვიდოდა, რომელიც რუსთაველის იუბილეს გადაიხდიდა და მწერლებს „შემლილი ხარისგან“ ნართმეულ სასახლეს დაუბრუნებდა.


სანთელს შენატროდა, „ბედნიერი ხარ, წვა შეგიძლიაო“.

თემურს წვა უკვე აღარ შეუძლია, იგი სანთელივით ჩაიღვანა.

სულეთს წაიღო აუხდენელი ოცნებები და მამულის უბედობისგან ატიკივებული გული.

მაგრამ ნუგეშად ის გვრჩება, რომ საქართველოს ჭირისუფალს დღეს მთელი საქართველო ჭირისუფლობს. მისი სახელი კი იმ დიდ ხელოვანთა სულეთს შეუერთდება, რომელთაც დავიწყება არ უწერია.

მაცვალა გონაშვილი რევზ მიშველაძე სოსო სიგუა ბალათერ არაბული



ვანო ჩხიკვაძე

მწუსარა ექსპრომტი

თემურ ჩალაბაშვილს, თემურ შავლაძეს

კარგი აბა რალა გვეყურება შემინდე, გამჩენო, გემდურები, როგორც აქმეული ბელურები გაფრინდნენ სულელები „თემურების“.

სიკვდილო, ამოდ მორიელო, ხსოვნა ლექსისა და ღვთის მონისა ცოცხლობს, ვიდრე ფეთქავს ღონიერი მაჯა სიცხიანი სტრიქონისა.

27.12.2023

ჯუბა ღებელი

ჩამს თემურ ჩალაბაშვილს

რა უეცრად ჩარაზა, დღემ ეს ღამე ვეება?! აღარა გყავს ჩალაბა, რა მეახალწლეება?!.

სიხარული კაიხანს, გულში ველარ იბუდებს, ახლა უკვე ხვალადან, ჩაიხუტებს დიდუბე!..

ხეებს რტოებმოტეხილს, ცრემლები სდით ბავშვივით, პარნასზეა პოეტი, თემურ ჩალაბაშვილი!..

ვეფერები შორიდან, ჩემს ძმასა და მეგობარს, რა უკვდავი ყოფილა, მოკვდავი რომ გვეგონა!..

წიავივით მიჰყვება, სიკვდილს, როგორც ზვარაკი, ეს თბილისის ბოჰემა, მზის ლექსებით მკაზმავე!..

რა უეცრად ჩარაზა, დღემ ეს ღამე ვეება, აღარა გყავს ჩალაბა, რა მეახალწლეება?!.

მიმართვა საქართველოს მოსახლეობას

ქართული ლიტერატურის მწვერვალი და მსოფლიო ლიტერატურის მშვენიერება შოთა რუსთაველის უკვდავი პოემა „ვეფხისტყაოსანი“.

რვასაუკუნენახევრის წინათ დაწერილმა ამ პოემამ მთელი თაობები აღზარდა რაინდობის, პატრიოტიზმის და ჰუმანიზმის სულისკვეთებით.

განსაკუთრებულია „ვეფხისტყაოსნის“ როლი გლობალიზაციით და ომების ფსიქოზით, შიშით დასწებობვებულ ამ საუკუნეში მოქალაქეთა სულის გასაჯანსაღებლად.

საქართველოს მწერალთა კავშირის პრესცენტრის მიერ ჩატარებული პირდაპირი და ირიბი სოციოლოგიური გამოკითხვის (სულ გამოკითხა 5 000-მდე ადამიანი) შედეგად დადგინდა, რომ საქართველოს მოსახლეობის 62 პროცენტს „ვეფხისტყაოსანი“ ნაკითხული არა აქვს.

„ვეფხისტყაოსნის“ პოპულარიზაციის კეთილშობილური მიზნით მოგინდებთ 2024 წლის 1 თებერვლიდან მთელი საქართველოს მასშტაბით გაიშალოს „ვეფხისტყაოსნის“ მასობრივი კითხვის კამპანია.

შოთა რუსთაველის უკვდავი პოემა ნაკითხულ იქნას ინდივიდუალურად და კოლექტიურად თითქმის ყველა ოჯახში, დაწესებულებაში, გაიმართოს „ვეფხისტყაოსნის“ ადგილების ზეპირად მცოდნეთა ფესტივალები, პოემის გადამწერთა ნამუშევრების წარდგენა და კონკურსში გამარჯვებულთა დაჯილდოება. ჩატარებულ იქნას საჯარო ლექციები „ვეფხისტყაოსნის“ შესახებ და ა. შ.

ეთხოვოს საქართველოს ხელისუფლებას თბილისში თავისუფლების პროსპექტზე გაიხსნას „რუსთაველის სახლი“, სადაც გაიყიდება „ვეფხისტყაოსანი“ სხვადასხვა ენაზე, მოგროვდება ხელნაწერები, ჩატარდება მეცნიერული მუშაობა პოემის ოპტიმალური ტექსტის დასადგენად.

„ვეფხისტყაოსნის“ უკვდავების ხელშეწყობა ყოველი ქართველის სამვილიშვილო ვალია.

საქართველოს მწერალთა კავშირი

ღირსეული ფილმი



მწერალთა კავშირის სააქტო დარბაზში ამას წინათ ჩატარდა გამოჩენილი მწერლის რევაზ მიშველაძის შემოქმედების ამსახველი დოკუმენტური ფილმის ჩვენება. ამ ძალიან საინტერესო ღონისძიებას ესწრებოდა ქართული საზოგადოების რჩეული ნაწილი. მწერალთა კავშირის ამ ისტორიულ დარბაზში მე პირველად ვიყავი საქართველოს ბუმბერაზი მგოსნის, გალაკტიონ ტაბიძის პანაშვიდზე და გამოსვენებაზე 1959 წლის 17 მარტს ჩემ თანაკლასელებთან ერთად. მცხეთაში მიხეილ მამულაშვილის მიერ დამზადებული თაიგულით მივედი მწერალთა კავშირში და იქიდან მივაცილეთ გალაკტიონი მთანმინდამდე. ამას ვიხსენებ იმიტომ, რომ გითხრათ, თუ რა საპატივსაცემოა ეს დარბაზი ჩემთვის. ჩვენი საზოგადოება ძალიან კარგად იცნობს ბატონ რევაზის მდიდარ შემოქმედებას. უყვარს მისი არაჩვეულებრივი ნოველები, რომანები და კრიტიკული წერილები. ფილმის ავტორებს ნიკო ბალაშვილს და მანანა გორგიშვილს მართლაც რომ მაღალპროფესიონალური, მხატვრულად სრულყოფილი, ღირსეული ფილმი შეუქმნიათ. მწერალმა დოკუმენტურ ფილმში გონივრულად ჩამოაყალიბა პრობლემები, რომლებიც ჩვენი სამშობლოს წინაშეა და სასწრაფო გადაწყვეტას მოითხოვს ხელისუფლებისაგან - ტერიტორიული მთლიანობის აღდგენის საკითხი, ეკონომიკა, სოფლის მეურნეობა, მრეწველობა, დემოგრაფია, ეკოლოგია, საკადრო პოლიტიკა და ა. შ. ასევე ობიექტურად ილაპარაკა ბატონმა რევაზმა თანამედროვე ლიტერატურის პრობლემებზე და ხელისუფლების დამოკიდებულებაზე მწერლობის მიმართ.

ბატონი რევაზ გულანთებული ჭეშმარიტი მამულიშვილი და ამავე დროს არაჩვეულებრივი და სასიამოვნო მთხრობელია. გასაკვირია, რომ ხანდაზმული ასაკის მიუხედავად გასაოცარი აზროვნება აქვს, შესაშური მჭერმეტყველებით საუბრობს მის მიერვე განვლილ ძალიან საინტერესო ათწლეულებზე.

რევაზ ჩემი სიყრმის და ახალგაზრდობის მეგობარია და ამით ვამაყობ. ჩემო რევაზო, გისურვებ მხნეობას, დიდხანს იხარე შენს საფიქარ სამშობლოში. მრავალჟამიერ ჩემო კეთილგონიერო, თხემით ტერფამდე ღირსეულო ქართველო!

ომარ მარგველაშვილი
აკადემიკოსი

აზრალაშის დიდი მემობარი

სასწარკვეთილი თეოდორ ჰერცელი, ავტორი წიგნისა „ებრაელთა სახელმწიფო“ (1896, 14 თებერვალი, ვენა) უშედეგოდ ცდილობდა დაემტკიცებინა ევროპისათვის ებრაელთა სახელმწიფოს შექმნის აუცილებლობა. მის ეპიგრაფს ერთ-ერთ წიგნზე: „თუ მოინდომებთ ეს არ იქნება ზღაპარი (1902) საფრანგეთმა, გერმანიამ, ავსტრიამ, თურქეთმა და სხვა ქვეყნებმა უარით უპასუხა. ერთადერთი რაც ჰერცელმა მოახერხა იყო ბრიტანეთის მთავრობის შეთავაზება აღმოსავლეთ აფრიკაში - უგანდაში შექმნილიყო ებრაელთა ავტონომიური თემი, რაზეც ჰერცელი დათანხმდა.

კიშინიოვში ებრაელების დარბევამ გამოიწვია რუსი ებრაელების აღშფოთება. რუსმა ებრაელებმა ხაიმ ლუმაწა ნორდაუს ესროლა (1903, დეკემბერი), ხოლო ჰერცელი 1904 წ. 3 ივლისს გულის შეტევით გარდაიცვალა.

აი, ამ ფონზე საინტერესოა სტალინის მოღვაწეობა ებრაელთა სახელმწიფოს შექმნასთან დაკავშირებით: სიმონ ბარ-კობხას აჯანყების შემდეგ (132-136), რომის იმპერიის წინააღმდეგ, რაც რა თქმა უნდა, შეცდომა და დანაშაული იყო ებრაელი ხალხის წინაშე, ისრაელის სახელმწიფო 2 ათასი წლის განმავლობაში არ არსებობდა.

1934 წელი. სტალინი ქმნის ებრაელთა ავტონომიურ რესპუბლიკას შორეულ აღმოსავლეთში - დედაქალაქი ბირობიჯანი.

1945 წელი. 11 თებერვალს იალტის კონფერენციაზე რუზველტმა მოულოდნელად ჰკითხა სტალინს თუ რა აზრის იყო ის სიონიზმზე. პასუხმა გასაოცარი შთაბეჭდილება მოახდინა არა მხოლოდ მთარგმნელზე - ჩარლზ ბოლენზე, არამედ თვითონ რუზველტსა და ჩერჩილზე, რომელთაც ნაკითხული ჰქონდათ სტალინის ნაშრომი: „მარქიზმი და ნაციონალური საკითხი“: „პრინციპში, მე მხარს ვუჭერ სიონიზმს, მაგრამ არის სიძნელეები ებრაული საკითხის მოსაგვარებლად. ჩვენი ექსპერიმენტი ბირობიჯანში ჩაიშალა, იმიტომ რომ ებრაელები ქალაქში ცხოვრებას ამჯობინებენ“. სტალინის პასუხი გამომდინარეობდა იმ აზრიდან, რომ ყირიმში ებრაული რესპუბლიკის დაარსება, როგორც ლამაზი და მაღალფარდოვანი სიტყვებით არ უნდა ყოფილიყო იგი შენიღბული, გარდაუვალად აღმოჩნდებოდა დენთით სავსე კასრი, როგორც რუსეთის, ასევე მთელი მსოფლიოს ებრაელობისათვის.

1945 წელი, 9 მაისი. სტალინმა დაამარცხა ფაშიზმი. ჰიტლერი მოკლეს და დაწვეს თავის ბუნკერში.

1948 წელი. სტალინი ბენ გურიონის თანადგომით ქმნის ისრაელის დამოუკიდებელ დემოკრატიულ სახელმწიფოს ალექსანდრე მიწაზე.

მე ვეკითხები მთელი მსოფლიოს პროგრესულად მოაზროვნე ადამიანებს: რატომ ადევს ტაბუ ამ ისტორიას განსაკუთრებით ისრაელში და საქართველოში.

იაკობ პაპიაშვილი
იერუსალიმი

ვალერი კვარაცხელია

ეს წიგნი, რომორც სიბრძნის სალარო...

მინანური რევაზ მიშველაძის რომანზე -
„ჩურჩულს გადაჩვეული კაცი“

ეს წიგნი, როგორც სიბრძნის სალარო - არის საფლავის გზა და სიმშვიდე, არცა ძნელი და არცა ადვილი, (ვაოქროსფერად დანაფერია, სადაც ნამდვილი ნამდვილია და არაფერია როცა სიცოცხლე, გამოგონილი - უფრო ნამდვილი... მაშინ სიკვდილიც არაფერია...

გადანწულია აქ ერთმანეთთან შემთხვევები და ბედისწერანი, ამ წიგნში სუნთქავს დიდი ეპოქა, ამ ეპოქაში - დიდი მწერალი... შენ არ გჩვევია მიპარვით მისვლა ზურგსუკან ბადის ხლართვა ჩუმ-ჩუმად, სიტყვა ღმერთია, ჯერ იყო სიტყვა, სიტყვა იყო და არა - ჩურჩული...

არის სიტყვები, - შვილი... სამშობლო... შენ არ გჩვევია გულნამცევობა არის საწუთრო, გაუტანელი, და ნემსის ყუნწში გავლა-ძრომანი, არის სასტიკი სიტყვაც, - შენირვა, შენი ყოველი დღე ნოველაა, და... რეალობა, აუტანელი... შენი ცხოვრება - ვრცელი რომანი!



რევაზ მიშველაძე

როგორც ჩვენი მკითხველისთვის ცნობილია, საქართველოს სახალხო მწერალმა, რუსთაველის პრემიის ლაურეატმა რევაზ მიშველაძემ 2020 წელს თავის მშობლიურ სოფელს, მარტვილის მუნიციპალიტეტის სოფელ თარგამეულს (თამაკონს) აჩუქა მის მიერ მთელი სიცოცხლის მანძილზე მოგროვილი 3 500 წიგნი. უნდა ვთქვათ, რომ ეს ფაქტი უპრეცედენტოა ქართული ლიტერატურის ისტორიაში. ამ წიგნების ბაზაზე ამჟამად თარგამეულში გახსნილია ბიბლიოთეკა, რომელსაც ამშვენებს წარწერა: „საქართველოს სახალხო მწერლის, რუსთაველის პრემიის ლაურეატის რევაზ მიშველაძის სახელობის ბიბლიოთეკა“. ბიბლიოთეკას ხელმძღვანელობს ცნობილი მეცენატი, პუბლიცისტი და საზოგადო მოღვაწე თემურ (ბურდა) პირტახია, რომელიც თითქმის ორმოცი წელია სოფელს სათავეში უდგას და ამავდროულად არაერთი ისტორიულ-კულტურული საქმის მოთავეა. მარტო იმის თქმა რად ღირს, რომ ბატონმა ბურდამ ცხრაჯერ გადაწერა „ვეფხისტყაოსანი“.

ვაქვეყნებთ რევაზ მიშველაძის და თემურ პირტახიას დიალოგს.

ბურდა პირტახია - ბატონო რევაზ!
აფხაზეთიდან დევნილებმა დოდო სიგუამ ბიბლიოთეკას შემოსწირა თქვენი წიგნი „ოცდახუთი მრისხანე წელი“.

დავასრულე წიგნის წაკითხვა. არ დაგიმალავთ, ძალიან მომეწონა, თან ამ წიგნის მოგონებებში ვადამისროლა. იგი უსათუოდ დაინტერესებს მკითხველს და ნაადრევად ასევე საქართველოს უახლესი ისტორიის შემქმნელ ავტორებსაც. წიგნში უხვადაა ფაქტები ძალიან საინტერესო თემებზე, ეს არის პერიოდი, რომელიც ჩვენც გავიარეთ. გავიარეთ პერიოდი, როცა არ გვქონდა ცხოვრების ელემენტარული პირობები. უშუქობა, უიმედობა და დაძაბული ატმოსფერო გვდევდა თან. მხედველობაში მაქვს არეულობის წლები, იარაღის სისტემატური ჭლარუნი, ძმათა მკვლელობები და ქაოსი. გაყინული ხელფასები, პენსიები, ჩამორთმეული შემნახველი ბანკის წიგნაკები, სრული უყურადღებობა და რაც მთავარია, ჩამორთმეული უფლება ადამიანური ცხოვრებისა.

თქვენს წიგნში ეს ბრწყინვალედ და ქრონოლოგიურად გაქვთ აღწერილი. რა თქმა უნდა, თქვენთვის ამ დღიურების წერა, როგორც ჭეშმარიტი პატრიოტისათვის, ძნელი იქნებოდა. წარმოდგენილი მაქვს დღიურების წერისას რამდენჯერ შეგიწყვეტიათ წერა და დარდს მისცემიხართ.

ჩემთვის, რიგითი ქართველისათვის, ძნელი იყო ამ ჩაშხამული და წართმეული წლების მოგონებებში ჩაძირვა და ყველაფერი გადატანის მოგონება. მაგრამ იმდენად საინტერესოდ გაქვთ ეს პერიოდი თქვენს მემუარებში აღწერილი, რომ ყოველ საღამოს თვალი წიგნისაკენ გამიბრუნდა და თავისუფალ დროს მის კითხვაში ვატარებდი.

წაკითხვის დამთავრებისთანავე დამებადა აზრი დაგისვით რამოდენიმე კითხვა, ბატონო რევაზ, და იმედი მაქვს ისეთივე გულწრფელი იქნებით პასუხებში, როგორც იყავით მთელი თქვენი შემოქმედების პერიოდში.

რევაზ მიშველაძის და თემურ პირტახიას დიალოგი

ბატონო რევაზ!
გთხოვთ თქვენებურად მოკლედ დაახასიათოთ დამოუკიდებელი საქართველოს პრეზიდენტები:

- ნოე ჟორდანიას;
- ზვიად გამსახურდიას;
- ედუარდ შევარდნაძე;
- მიხეილ სააკაშვილი;
- გიორგი მარგველაშვილი;
- სალომე ზურაბიშვილი.

- ნოე ჟორდანიას, როგორც თავიდანვე სოციალ-დემოკრატს, საქართველოს დამოუკიდებლობაზე არც უფიქრია, მაგრამ რაკი ისტორიამ იწემა მისი დამოუკიდებელი საქართველოს სათავეში მოქცევა, რა გაეწყობაო, გაიფიქრა, თუმცა ორთავიანი არწივის შიშით ღამეები არ ეძინა. როცა სოღანლულიდან 1500 რუსი ტყვე კარზე მიაყენეს, შეძრწუნდა, ამით რომ რამე მოუვიდეს, ლენინი და სტალინი ყურებით ჩამოკიდებენო. რამდენიმე დღეში „ე მანდ მართლა არ გავიმარჯვოთ“ (რეზო გაბაშვილი). შუალამისას თავისი მთავრობით მიატოვა საქართველო და გაიქცა.

ზვიად გამსახურდია ჭეშმარიტად ეროვნული კაცი იყო. დისიდენტური მოძრაობიდან მოსული. მისთვის სამშობლოს თავისუფლება უმაღლესი და ერთადერთი იდეალი იყო. მან თავისი ქარიზმატულობით და უკომპრომისო ბრძოლით მართლაც მიაღწია კომუნისტური მონობიდან ქვეყნის გამოხსნას, მაგრამ, როგორც თქვენს მიერ დასახელებულ წიგნში ვწერ, სოლომონ ბრძენიც რომ ყოფილიყო, რუსეთი ზვიადს მაინც დაამხობდა. ევროპამ (კერძოდ საფრანგეთმა) ჟორდანიას მთავრობა შეიფარა, მაგრამ ზვიადის დროს სხვა ვითარება იყო, რუსეთმა პიტლერს კბილები ჩაუმიტვრია და მე რას მიზამსო, გაიფიქრა მშობარა საფრანგეთმა და ზვიადს თავშესაფარი არ მისცა. ასე განიარა მსოფლიომ საქართველოს მეორე პრეზიდენტი.

საერთოდ კი ზვიად გამსახურდია ჩემთვის ჭეშმარიტი მამულიშვილობის მაგალითია.

ედუარდ შევარდნაძე გამოცდილი, ჭკუადამჯდარი პოლიტიკოსი იყო, მაგრამ მშობარა, იგი ვერ გათავისუფლდა რუსეთის ვასალის, რესპუბლიკის ცეკას მდივნის სინდრომისაგან. უკვე დამოუკიდებელი საქართველოს პრეზიდენტი იყო, როცა თვითმფრინავში ინტერვიუს მიცემის დროს წამოც-

და: „გუთხარი ელცინს, თუ არ მოგწონვარ, გამათავისუფლე, ჩემს გზაზე წავალ-მეთქი“. როცა აფხაზეთის ომში ერთადერთი შვილი დამეღუპა და ცოტა ხანში სნგ-ში შევბრუნდით, მივედი მასთან. თუ სნგ-ში შევდიოდით, რატომ შეახოცე ხალხი მტერს-მეთქი. დაფიქრდა და ყრუდ ამოილაპარაკა - რეზო, შენ მართლა პრეზიდენტი ხომ არ გგონივარო, როცა უნდა რუსი ამ ჩემს კაბინეტში ჩამოუშვებს „გრუპა ზახვატას“ და კურდღელივით ამიტაცებენო. ხომ არ გგონია, ან მეზობლი არმია გვყავს და ან შეიარაღება გვაქვსო, შენზე არანაკლებად განვიცდი, ჩემო რეზო, შენი აჩიკოს

დალუპვასო. ა, ეს იყო შევარდნაძე.

ზოგ ბეც ისტორიკოსს ჰგონია, რომ მიხეილ სააკაშვილი რევოლუციურ ტალღაზე მოვიდა საქართველოს პრეზიდენტად. ეს მტკნარი სიცრუეა. სინამდვილეში არავითარი „ვარდების რევოლუცია“ არ არსებულა. ამერიკას და რუსეთს მოსწყინდათ შევარდნაძე, რომელიც ხშირად ორმაგ თამაშს თამაშობდა თავის გადასარჩენად. ამ ორმა ზესახელმწიფომ ერთობლივად გადაწყვიტეს უნიათო შევარდნაძის ჩანაცვლება. ამ „ჭიდილში“ ამერიკამ იმარჯვა, მოძებნეს ქარიზმატული ავანტიურისტი მიხეილ სააკაშვილი და მონაცყვეს გადატრიალება. „ორივემ, ამერიკამაც და რუსეთმაც ერთდროულად მიღალატესო“, შევარდნაძეს ჩემთვის აქვს ნათქვამი. დღისით-მზისით ხულიგანთა ბრბო მიხეილ სააკაშვილის წინამძღოლობით შევარდა პარლამენტში და გააქციეს შევარდნაძე, რომელიც მოხსენებას კითხულობდა. ეს იყო ავანტიურა, კანონიერი ხელისუფლების ძალადობრივი დამხობა, რაიც დღემდე გამოუძიებელია. სხვათა შორის, ეს ყაჩაღური თავდასხმა სააკაშვილს ხახვივით შერჩა და ამიტომაცაა, რომ მიხეილის კუდებმა მერეც არაერთხელ მიმართეს ამ ძალადობას და დღესაც ეს აქვთ თავიანთ არსენალში.

ამის შემდეგ რაც მოხდა, თქვენც კარგად მოგეხსენებათ. 47 ბრალდება წაუყენა პროკურატურამ სააკაშვილს და მხოლოდ 3 დანაშაულისთვისაა გასამართლებული. „მიშიკომ“ დაამხო, ფეხით გათელა ქართული ეროვნული სახელმწიფო და გლობალიზაციის ჩანჩქერს შეუყენა: პირადობის საბუთებში ეროვნების და მამის სახელის წაშლა, სასკოლო სახელმძღვანელოებიდან ყველა პატრიოტული ნაწარმოების ამოღება, ქართული ენის პალატის გაუქმება, ქართული მინების უცხოელებზე გასხვისება, აფხაზეთის და სამაჩაბლოს მტრისთვის ჩაბარება, ი. ჯავახიშვილის უნივერსიტეტის და მეცნიერებათა აკადემიის ფაქტობრივი გაუქმება, მწერალთა კავშირისთვის ისტორიული შენობის წართმევა და იქ არსებული მემორიალური ნივთების ქუჩაში გამოყრა, უდანაშაულო ახალგაზრდების დახვრეტა, ციხეში პატიმართა სადისტური წამება, სახელმწიფო ბიუჯეტის უმოწყალოდ გაფლანგვა, ახალგაზრდების საზღვარგარეთ გადინებისთვის

ხელშეწყობა... აი, მის მიერ ჩადენილი დანაშაულების მცირე ჩამონათვალი.

როცა ფსიქიურად გაუნონასწორებელი, ულმობელი მიხეილ სააკაშვილი ქართველმა ერმა ისტორიის სანაგვეზე მოისროლა, „ქართულმა ოცნებამ“ მხარი დაუჭირა პრეზიდენტად გიორგი მარგველაშვილის კანდიდატურას.

მაღე გაირკვა, რომ გიორგი მარგველაშვილს პირადი ამბიციების და განდიდების მანიის გარდა სხვა არაფერი აინტერესებდა. მას არავითარი გონივრული სახელმწიფოებრივი გეგმა არ გააჩნდა. წარმოდგენა ხომ არ ჰქონდა მრენველობასა და სოფლის მეურნეობაზე, ქვეყნის სოციალურ ცხოვრებასაც ვერავითარი სიკეთე ვერ შემატა. განათლების და კულტურის საკითხების სრული სიბეცე გამოიჩინა. ყოველ შეხვედრაზე ვეუბნებოდი: ბიჭო, ვიცი, გლობალიზაციის წნეხის ქვეშ ხარ, მაგრამ ის მაინც გააკეთე, რაც შეგიძლია; ქართველებს სააკაშვილის მიერ წართმეული ეროვნება დაუბრუნე და მწერლებს თავიანთი სახლი ტრიბუნად და თავშესაფრად, ამასაც ხომ ამერიკის პრეზიდენტის ნებართვა არ ჭირდება-მეთქი. თქვენც არ მომიკვდეთ, თავი არაფერზე შეინუხა. სააკაშვილის ნამუდრეგალი არცერთი ნაღმა არ შემოაბრუნა.

თუ გახსოვთ, რა სასაცილო იყო მისი პრეზიდენტურ-ინდაურული ფაფხური. პრემიერი კი არა, მე ვარ პირველი კაციო, ამიტომაც ხშირად საერთაშორისო ფორუმებზე ორნი მიდიოდნენ და მასპინძლებმა არ იცოდნენ, პირველად ხელი ვისთვის ჩამოერთმიათ.

ყველანი გულწრფელად ვნანობთ, ვინც საპრეზიდენტო არჩევნებში სალომე ზურაბიშვილს მივეციოთ ხმა. მისმა იმიგრანტულმა ბიოგრაფიამ მოგვატყუა. მე ამიტომ ორიოდე სიტყვით დავახასიათებ. გაუნათლებელი ქალია. მსოფლიო პოლიტიკაში სრულიად გაურკვეველი და გაუცნობიერებელი.

თუ მარგველაშვილი „ტყემალზე იჯდა“, სალომეს დროს ხომ მაინც გარკვეულია, რომ საქართველო საპრეზიდენტო კი არა, საპარლამენტო რესპუბლიკაა.

რას დაქანაობს ზევით-ქვევით ოჩანი ცხოველივით, ეუბნებიან არ გენდობით, ჩვენი ხმა აღარ ხარო და მაინც „უცილობლობს, ვითა ჯორი“.

ახლა, როცა ქვეყანას ხელისუფალთა ერთად ყოფნა, ერთ მუშტად შეკვრა სჭირდება, სალომე სწორედ ახლა იქცა „განხეთქილების ვაშლად“ მაღალი ეშელონებისათვის.

- ბატონო რევაზ!
მე ედუარდ შევარდნაძეს დიდი ხანია ვეძახი ფონდირებულ პრეზიდენტს და რატომ?

კომუნისტურ ხანაში ყველაფერი გათვლილი იყო სსრკ მინისტრთა საბჭოს მიერ. ამ საკითხს შესანიშნავად უძღვებოდა ძლიერი ეკონომისტი კოსიგინი. მოსკოვი გეგმავდა ყველაფერს. რამდენი თავლა უნდა ეშენებინა, რამდენი სკოლა და ა. შ. და ამისათვის რამდენი ცალი ლურსმანი თუ ჩაქუჩი იყო საჭირო. ყველაფერს წყვეტდა მოსკოვი და საქართველომ იცოდა საიდან, სსრკ-ს რომელი კუთხიდან უნდა მიეღო ესა თუ ის მასალა. ამას უწოდებდნენ ფონდირებულს. მზამზარეული ჩამოდიოდა ყველაფერი. ამიტომ ვეძახდი ცკ-ს პირველ მდივანს ე. შევარდნაძ-



ეს ფონდირებულს. მოსკოვი წყვეტდა კადრების საკითხსაც, ვინც დანიშნული იქნებოდა მალალ თანამდებობებზე.

როგორც კი პრეზიდენტად მოგვევლინა, ეგრევე გამოჩნდა მისი უუნარობა, რადგან მზა რეცეპტებს მას არავინ უგზავნიდა. მან ვერ გადალახა ბარიერი მხარში ამოდგომოდა ქართველ ხალხს და ელვანა სამშობლოსათვის.

იგი მთლიანად მოსკოვზე იყო დამოკიდებული და ასრულებდა მათ დავალებებს, როგორც პოლიტიკოსი იგი ბევრად ძლიერი იყო და შეეძლო ბევრად უკეთესი პოლიტიკა გაეტარებინა თავისი სამშობლოს სასარგებლოდ. მაგრამ მან ეს არ გააკეთა. პირიქით დაასუსტა ქვეყანა და კორუფციის ნუმპეში მოაქცია. გვახსოვს ყველას მედიიდან: „გაფუჭდა მე-8 ბლოკი“, „გაფუჭდა მე-9 ბლოკი“, „ამას სჭირდება 20 მილიონი“, „ამას ათიო“ და ა. შ.

სიბნელეში ამყოფა ქვეყანა. სრული ქაოსი და უიმედობა დატეხა. პარალელურად ზრუნავდა ნათესავებისა და თავისი გარემოცვის გამდიდრებაზე.

გაალმერთა ისინი. ეს კი დავალებად მოსკოვიდან ჰქონდა. ბატონო რევაზ!

მაინტერესებს თქვენი აზრი. „ედუარდ ფონდირებული“ მიესადაგება თუ არა მის სახელს. სსრკ-ს დროს ეკონომიკის ფონდირებულ ცკ-ს მდივანს სსრკ-ს დაშლის შემდეგ კი პოლიტიკის ფონდირებულ პრეზიდენტს.

- თქვენს ამ საინტერესო კითხვაში პასუხიც კარგად ჩანს, ამიტომ ბევრს ველარაფერს დავამატებ, გარდა იმისა, რომ საერთოდ ვეთანხმები.

საზოგადოება ორ შევარდნაძეს იცნობს: ერთი იყო მართლაც ფონდირებული, მოსკოვიდან მართული, მრისხანე ცკ-ს მდივანი, რომელმაც თავისივე მეგობარი დაახვრეტინა და უნებლიე დამნაშავენი - „თვითმფრინავის გამტაცებლები“ სასიკვდილოდ განირა. მეორე შევარდნაძე იყო უკვე მონათლული (გიორგი) და თითქოსდა ახალი საქართველოს მშენებელი. სინამდვილეში კი ფაქტიურად შევარდნაძის მეტამორფოზა ეროვნულ კაცად არ მოხერხდა. ამ მხრივ იგი ტრაგიკული პიროვნებაა.

ისე, პირად ურთიერთობაში სასიამოვნო, თბილი კაცი იყო. გაპრეზიდენტების შემდეგ ოთხჯერ მოვიდა მწერალთა კავშირში და ჩვენთან საუბარს ასე იწყებდა: მე ჩემს მასწავლებლებთან მოვედიო. ეს მაშინ, როცა ზემოთხსენებული 6 პრეზიდენტიდან შევარდნაძის გარდა არცერთი არ მოსულა ჩვენთან რჩევის საკითხავად. სააკაშვილი კი აშკარად მწერალთა მოძულე იყო.

გარდა ამისა, ბატონ ედუარდს იუმორის საოცარი გრძობა ჰქონდა, რითაც იგი იდეურ მონინალმდეგებთანაც კი ურთიერთობის დათბობას აღწევდა. რეიგანთან პირველი შეკითხვის დროს ამერიკის პრეზიდენტს ჰკითხა: თქვენი მეუღლე

როგორ ბრძანდება? იცნობთ? გაცემულმა რეიგანმა კითხვა შეუბრუნა. არა, მე უბრალოდ ისეთი ქვეყნიდან ვარ, სადაც ადამიანები პირველ რიგში ერთმანეთს ოჯახებით მოიკითხავენო.

მასსოვს, ყაზბეგის იუბილეზე სტეფანწმინდაში ვიყავით, უკან დაბრუნებისას ფასანაურში გაგვჩერა. თუ ძალიან არ გეჩქარებათ, ნუ მეტყვით უარს და ერთად ვივანხმობთო. სად გვეჩქარებოდა. ვახშამი დილის 5 საათამდე გაგრძელდა. ეს იყო იუმორის, სიმღერის, მართლა ქეიფის ფეიერვერკი. სხვათა შორის კახური იუმორის ერთი ნიმუშიც მოვეყვი. საბავშვო ბაღის მასწავლებელს კახელი მიმართავს: ჩემი ბაღი გამაიყვას! - რომელია შენი ბაღი! - კაცო, რომელიმე გამაიყვას, ხვალ ისევ აქ უნდა მაიყვანო?!“ სიცილი ძალიან უხდებოდა. თავის მხრივ ავლიბი ზურაბაშვილის ზუმრობა თქვა: გიჟს ბოლომდე ვერ მოვარჩევ, მაგრამ გურულის დონემდე ავიყვანო. ამაზეც ბევრი იცინა.

ბატონო რევაზ!

შეიძლება თუ არა სწორი პოლიტიკის შედეგად აფხაზებთან სიტუაციის აღაგება და ომის თავიდან აცილება?

უმძიმეს წლებად მოიხსენიებთ მეშუარეობაში ამ წლებს. მე როგორც რიგითი ქართველი ვთვლი, რომ ეს ოცი წელი საერთოდ არ მიცხოვრია და ეს უგუნური პოლიტიკის შედეგი იყო. ერთხელ ასეთი კითხვაც დამებადა თავში, 70-ისა ვარ თუ 60-ის? სსრკ-ს დაშლიდან ახალი საუკუნის შემოსვლამდე ხომ მე არ მიცხოვრია. თქვენ ძალიან კარგად იცით, რამოდენა მთა გადმოჰყურებს სოფელ თარგამეულს მარცხენა მხრიდან, ანუ ე. წ. თარგამეულის ქედი. ქედზე გადასასვლელი ბილიკებით მარტვილის ცენტრამდე 11 კმ-ია მანძილი და თქვენ წარმოიდგინეთ, ბავშვები რომ არ დახოცილიყვნენ შიმშილით, სისტემატურად მიხდებოდა ამ მანძილის გავლა იქით და აქეთ, ხშირად ღამითაც. და ეს რისთვის? 3 თუ 4 ცალი პურისათვის. ხშირად ხელცარიელიც წამოვსულვარ. განა ეს ცხოვრება იყო, ბატონო რევაზ? წარმოიდგინეთ ჩემსავით რამდენი გადადიოდა ამ ქედზე.

განა ცხოვრებად ითვლება ტელევიზორი კორფუჯი, 12 ვოლტზე მომუშავეს რომ ვერ ჩართავდი? კვირაში ორჯერ შეიღებეს ხელის ურიკით მიჰქონდათ აკუმულატორი თარგამეულის ბოლოს მიშველაძეების ხელნაკეთ ელექტროსადგურზე დასატენად. მოიტანდნენ სახლში სანახევროდ დატენილ აკუმულატორს და მეხვეწებოდნენ სერიალს მაყურებინეთო, მამა. მე კი ინფორმაციას ვერ ვუყურებდი. მაროო ჩიმიარო გადიოდა მაშინ. განა ეს იყო ცხოვრება? ეს ღორბობა იყო, ბატონო რევაზ.

თქვენ თქვენს მეშუარეობაში წერთ, რომ ცკ-ში დაგიბარათ ედუარდმა 1989 წელს და მან ხაზგასმით აღიარა, რომ უბედური საქართველოსათვის სასიკეთოს ვერაფერს გააკეთებდა.

იბადება კითხვა, თუ ვერ გააკეთებდა (ან არ გააკეთა) მაშინ რატომ დაბრუნდა პრეზიდენტად ზვიად გამსახურდიას შემდეგ?

შევაფასოთ ეს ფაქტი. მოსკოვის გეგმას ასრულებდა ფონდირებული პრეზიდენტი?

შეეძლო კი?

ან რატომ არ შეეძლო? მას ხომ მთელი დასავლეთი და ამერიკა იცნობდა.

მას ხომ შეეძლო თავიდან აეცილებინა აფხაზეთის ტრაგედია? რატომ არ გააკეთა ეს? ელცინი ხომ მასზე ზევით არ იდგა ჭკუითა და გონებით?

აფხაზეთი ხომ ჩვენი ყველას გულის ტკივილია. ედუარდი უნდა გადაფარებოდა მას და არ უნდა დაეთმო რუსებისათვის.

რატომ არ გადაეფარა, ბატონო რევაზ?

თქვენთვის ხომ ორმაგი ტკივილია აფხაზეთის დაკარგვა. აფხაზეთის დაკარგვაც ხომ მწარედ განიცადეთ და მითუმეტეს მის დაცვას შეეწინაა თქვენი საყვარელი აჩიკო, რომელსაც უფლებას ჰქონდა ეცხოვრა ამ ტანჯულ საქართველოში. ასეთმა უგუნურმა პოლიტიკამ თქვენ ორივე ფრთა მოგტეხათ. ჭეშმარიტი ქართველი ასე განსჯის ამას.

თქვენი სახელობის ბიბლიოთეკაში მე პირადად აჩიკოსათვის პატარა კუთხე მოვანყე, იგი ხომ გმირია. ყვავილები მოაქეთ ბავშვებს მისთვის, ცოცხალი ყვავილები. ბატონო რევაზ! თქვენი სტუმრობის დღე 22 ოქტომბერს თქვენ დაათვალიერეთ თქვენი სახელობის ბიბლიოთეკა და აჩიკოს კუთხესთან შეჩერდით. მე ცრემლის ნაპენკალი დავინახე თქვენს თვალბეჭდში. მძიმე იყო ეს მომენტი. იქვე ნაიკითხეთ აჩიკოს პირობითად ნაწერიც..

პუტინს! თქვენს კისერზეა ჩემი სიკვდილი, ღმერთი მოგკითხავს ამაზეო

რამოდენიმე დღის მერე ვუფიქრებდი ამ გამონათქვამს და მეზადება კითხვა. ამ საცოდაობაში უგუნური ქართველთა ხელიც ხომ არ ურევია-მეთქი.

გთხვთ დაიმშვიდოთ ნერვები და თქვენებურად, ღირსეულად გამცეთ პასუხი.

შეიძლება თუ არა აფხაზეთში ძმათა მკვლელი ომის თავიდან აცილება?

და რა იყო ამისათვის საჭირო?

შეეძლო თუ არა ქართველ ფონდირებულ პრეზიდენტს მოეძებნა გასაღები, რომელიც მოერგებოდა ამ უგუნურ პოლიტიკას?

ბევრი კითხვის ნიშანი დაისვა და გთხოვთ მოკლედ უპასუხოთ ამ კითხვებს.

- აფხაზეთის და სამაჩაბლოს წართმევა რუსეთის დამსჯელობითი ღონისძიება იყო, შევარდნაძისთვის ჭკუის სასწავლებლად. რაკი ბოლო დროს შევარდნაძე აშკარად იხრებოდა დასავლეთისაკენ, რუსეთმა იგი განირა.

შეიძლება თუ არა ე.წ. „აფხაზეთის ომის“ თავიდან აცილება? რა თქმა უნდა შეიძლება. თქვენ ამბობთ, „აფხაზეთთან სიტუაციის დალაგებაო...“ არავითარი აფხაზეთის ომი, ბატონო ბურდა, არ არსებობდა. ეს გახლდათ რუსეთ-საქართველოს ომი და უბადრუკ აფსუებს არავინ არაფერს ეკითხებოდა, ისევე როგორც ახლა.

შევარდნაძე ბევრჯერ მოატყუეს, ხოლო საბედისწერო მოტყუება ის იყო, რომ ენდო ამერიკას. იფიქრა, ამერიკის შიშით რუსეთი ვერაფერს გამიბედავსო. რომ შეებრუნებინა ფეხი რუსეთისაკენ არაფერიც არ მოხდებოდა. შევარდნაძეს აკლდა ის, რაც ქართველ მეფეთა უმეტესობას ჰქონდა: პოლიტიკური ალლო, ლავირების უნარი. საქართველო ხან ირანს „დაუმეგობრდებოდა“, ხან ოსმალეთს უპაჭუნებდა თვალს. პოლიტიკასა და დიპლომატიამითავარია მომენტის შერჩევა. ეს მომენტი შევარდნაძეს გამოეპარა. თავის მხრივ ვერაგმა ამერიკამ მოატყუა შევარდნაძე, თავისი მფარველი სამხედრო კალთა არ გადააფარა. არც ახლა ცდილობს დასავლეთი საქართველოს დაუბრუნოს წართმეუ-



ლი ტერიტორიები. ცარიელი ლაილაი საქმეს ვერ შევლის.

ბატონო რევაზ! მეშუარეობაში ბევრგან ეხმიანებით აფხაზეთისა და აჭარის ავტონომიების საკითხს. რადიკალურად მოითხოვთ მათ გაუქმებას. ასევე სამხრეთ ოსეთის ავტონომიური ოლქისაც. ახსენებთ ნოე ჟორდანიასაც. მოგყავთ პროფესორი გივი ჟორდანიას ნათქვამი: აფხაზეთისა და აჭარის ავტონომიები ნოე ჟორდანიას შექმნილიაო 1919 წელს.

რას იტყობთ დამოუკიდებელი საქართველოს პირველ პრეზიდენტზე? მოკლედ დაგვიხსიათ იმდროინდელი შიდა და გარე პოლიტიკა.

ბატონო რევაზ, ხომ არ გაგივლიათ პარალელი იმდროინდელ საქართველოს და ამჟამინდელ საქართველოს შორის? ძაან ბლომად ხომ არ ჰყავდა ამ პატარა ქვეყანას ქვეყნის აღმშენებლები და დამატკეველები? ავილოთ მაშინდელი კონაკონა ბოლშევიკები და მენშევიკები: ორჯონიკიძე, მახარაძე, ცხაკაია, გეგეჭკორი, ნულუკიძე და სხვები.

ავილოთ ახლანდელი კონაკონა პოლიტიკოსები: ბურჯანაძე, ყვანია, სუბარი, ვაშაძე, მელია, და ათასი სხვა. ხომ არ გიფიქრიათ, ბატონო რევაზ, იმაზე, რომ ძირფესვიანად შესაცვლელია ქვეყნის ძირითადი კანონი ანუ კონსტიტუცია?

იქნება დადგა დრო ბოლო მოეღოს ამ ვაკხანალიას?

იმდენად გაიშალა პარტიათა რაოდენობა, რომ მის შექმნას ბოლო არა აქვს ბაქოს მატარებელივით და იქმნება ისინი რისთვის?

იმისთვის, რომ ხალხმა ფული იშოვოს, ერთიანდებიან მასში ახალგაზომცხვარი პოლიტიკოსები, რომლებმაც ეს-ესაა იყნოსეს, რომ იქ ფულს იშოვნიან და თოხები გააგდეს ხელიდან.

რა უბედურებაა ეს, ბატონო რევაზ? რა გეჭირს?

პოლიტიკომანია? თუ?

ვერ მომიძებნია სახელი.

ცხოვრებულ ვაჟა აბაკელიას აქვს ჩემთვის ნათქვამი: პარლამენტში იურისტები უნდა ისხდნენ და არა კაცობის მაძიებლებიო.

ბევრჯერ დავბრუნებულვარ მის ნათქვამს და ვფიქრობ, რომ მართალი იყო ეგ კაცი. ის ხომ ჭკვიანი იურისტი იყო.

ახლა ერთ მაგალითსაც მოვიყვან, ბატონო რევაზ.

სოფელ თამაკონში თქვენს მშობლიურ თემში კოლმეურნეობის თავმჯდომარედ 30 წელი მუშაობდა მარლენ აბაკელია. იგი ძლიერი ხელმძღვანელი იყო, მაგრამ ყოველთვის უჭირდადბრიგადირებისა და მერგოლურების არჩევა. ასევე იყო სხვა სოფლებშიც.

ახლა კი რა ხდება?

თურმე იმდენი გყვოლია ხელმძღვანელად ვარგისები და საქმის მაკეთებლები, რომ მტრისას. ყველა ცდილობს გაერთიანდნენ პარტიებში, რომელიც ასარჩევად გყავს და ჯიბეში ხელე-

ჩაყოფილები და თავანულები თავს აწონებენ გარშემო მყოფს. ამიტომაც, რომ ეს არაფრისმაკეთებლები ანუ განათლებულები არჩევნების დროს ტვინს ურევინ მოსახლეობას, რომელთაც ჰგონიათ, კაცთან ანუ პატრიოტთან აქვთ საქმე დაჭერილი. არ გაგიკვირდეთ, ბატონო რევაზ, თურმე ასზე მეტი ასეთი ბეჯითი ხელმძღვანელად ვარგისი პიროვნება გვეყოლია თემში.

ამას კი რა ჯობია. მე ბოდიშს მოვიხდის სოფლის ინტელიგენციასთან, რომლებიც კარგად უძღვებიან თავიანთ საქმეს. აქ კი ლაპარაკია ჯანდონით სავსე ახალგაზრდობაზე, რომელთა ნაწილიც მართლა სანიშნავია.

ცხოვრებული მარლენი ხომ აცრემლდებოდა, რომ ენახა ეს მდგომარეობა. ეს ის ხალხია, რომლებსაც არასოდეს არ უსწავლიათ, არც ეკონომიკა ესმით, არც პოლიტიკა. აი, სადაა ძალის თავი ჩამარხული. მაინტერესებს, თქვენ რას იტყვით ამის შესახებ, ბატონო რევაზ, ესაა დემოკრატია?

ხომ არ დადგა დრო, ბოლო მოელოს ამ უმსგავსოებას?

ხომ არ დადგა დრო საქართველოს კონსტიტუცია ისევ შედგეს, რომ მოერგოს ქვეყანას?

ხომ არ დადგა დრო იგი შეადგინოს პროფესიონალებმა?

ხომ არ დადგა დრო, შეიქმნას ვეტერან გამოცდილ ადამიანთა კრებული, რომელთაც მიეცემა უფლება, ჩაერთონ ქვეყნის ძირითადი კანონის შექმნაში?

ხომ არ დადგა დრო, ამდენი პარტიები მინიმუმამდე დავიყვანოთ და ქმედით უნარიანი გავხადოთ?

პარტიათა სიმრავლემ და თავაშვებულობამ ხომ მიგვიყვანა სავალალო შედეგამდე. უამრავი ფაქტია განხეთქილებებისა ოჯახებშიც კი, მეზობლებშიც, მეგობრებშიც, სანათესაოშიც. რად გვინდა ეგ ღმერთის ბოძებული საქართველო თუ დავჭამეთ ერთმანეთი.

გთხოვთ, გულწრფელად გამოხატოთ თქვენი აზრი ამ საკითხზე, როგორც გჩვევიათ და გიკეთებიათ კიდევ. ამერიკაში სულ 5 პარტიაა და პანანკინტელა საქართველოში 257. ქართული ანდაზის მიხედვით ორი გამდელის ხელში ყმანვილი იჩაგრება და 257 გამზრდელის ხელში რა მოუვა. ჩვენი პოლიტიკის ხომალდის „სვლა“ კრილოვის ერთ იგავს მაგონებს, ტვირთს სამივენი რომ სხვადასხვა მხარეს ეწევიან.

„უჩემოდ ვინ იმღერეთას“ სენმა კინალამ დადუშვა საქართველო რამდენჯერმე და ახლაც ეს სენი გვჭირს.

ო, როგორ სძულთ ერთმანეთი პოზიციას და ოპოზიციას. სიამოვნებით დაღვედნენ ივანიშვილის და ღარიბაშვილის სისხლს სამადაშვილი და ხაბუიშვილი.

რა თქმა უნდა, სიგიჟეა ამდენი პარტიის არსებობა. მითუმეტეს მაშინ, როცა ზოგი პარტია მხოლოდ ქალაქებში არსებობს.

შესაცვლელია კანონი პარტიათა დაფინანსების შესახებ.

ვინ დააკანონა, რომ სახელმწიფო უნდა აფინანსებდეს ამდენ არაფრის-მომქმედ პარტიას?

რაც უფრო მეტს ვწერთ მწერლები შერიგების, ერთ მუშტად შეკრის შესახებ, მით უფრო შორდებიან და კბილებს უკრაჭუნებენ ერთმანეთს.

ეს მხოლოდ და მხოლოდ სკამებისთვის ბრძოლაა და სხვა არაფერი.

თოხი და ბარი არავის უნდა, ეადვილებათ პარლამენტში წამოპლაკვა და სისულელების ლაღადი.

თქვენ მართალი ხართ:

„რად გვინდა ეს ღმერთის ბოძებული საქართველო თუ დავჭამეთ ერთმანეთი“.

რაც შეეხება პარლამენტში მხოლოდ იურისტების ყოფნას, წერა-კითხვის მცირე მცოდნე, პოლიტიკურად უციცი, ორ ბატს რომ ვერ ჩააბარებ ისეთი იურისტიც ბევრი მინახავს და საერთაშორისო ვითარებაში ღრმად გარკვეული დიპლომატიის დიდებულად მცოდნე მწერალი ხელოვანიც.

- ხშირად მესმის საზოგადოებაში: პრეზიდენტი ზვიად გამსახურდიას დიპლომატია არ უფარგოდაო.

ზვიადი იყო ქვეყნის პატრიოტი ადამიანი. მან სიყვარული დათესა ხალხში.

მაინტერესებს, რას იტყვით ზვიადის კარგზე და შეცდომებზე?

- საქართველოს პრეზიდენტთა შორის ეროვნული მოღვაწე მხოლოდ ზვიად გამსახურდია იყო.

ჩვენ თანაკურსელები ვიყავით. ახალგაზრდა მწერალთა წრეზე ერთად დავდიოდით და როცა ლიტერატურული საღამოების ჩასატარებლად თბილისის გარეთ გვინებდა ყოფნა (მაგალითად, მესხეთ-ჯავახეთში) ერთ ოთახში გვეძინა. უაღრესად ერუდირებული ღრმად განათლებული გახლდათ. მშობლიურის გარდა რუსული და ინგლისური ბრწყინვალედ იცოდა, გერმანულსაც ფლობდა, ბრწყინვალე ორატორი იყო. შესანიშნავად თარგმნიდა, მაგრამ თარგმანების გამო ხშირად აკრიტიკებდნენ, რადგანაც ენაში ძველი ქართულის კონსტრუქციები შემოჰქონდა.

რა ნაკლებზე შეიძლება ლაპარაკი, როცა ის გაუკვალავ გზაზე მიდიოდა. წინამორბედი არ ჰყოლია, მას ხომ არ დააცადეს, ფაქტიურად წელიწადნახევარი იყო პრეზიდენტი. უმძიმეს დღეში ჩააგდეს კადრების მხრივ, თუ ვინმესთვის ხელი ჩამოურთმევია, ყველამ მინისტრობა მოინდომა. ერთხელ დამირეკა, თუ კაცი ხარ, ახალგაზრდის პრეფექტად იქნებ ვინმე შემირჩიო. მივუყვანე უნივერსიტეტის დოცენტი აკაკი მათიაშვილი, მაშინვე დანიშნა.

მე ძალიან ვუყვარდი და ძალიან მენდობოდა. მოსკოვში მწერალთა პირველ დელეგაციის (წევრები: შოთა ნიშნიანიძე, მურმან ლებანიძე, იგორ ბოგომოლოვი, გურამ გვერდინთელი, მზია ხეთაგური, გოგი გაჩეჩილაძე) ხელმძღვანელად მე დამნიშნა.

თუ დიპლომატიაზე ვილაპარაკებთ, ალბათ ის უნდა ვთქვათ, რომ ერთდროულად დაუპირისპირდა რუსეთსაც და ამერიკასაც, მაგრამ მას სხვანაირად არ შეეძლო. ის ხომ საქართველოსთვის შეწირული კაცი იყო.

- კარგად მახსოვს ზურა ჟვანიას მოღვაწეობა. ჟვანიას „პოლკოვნიკები“ არჩევნების გაყალბების მისეული მეთოდები. მისი ბოსტანი, სადაც „პოლკოვნიკების“ ჩითილები გამოყავდა.

თქვენ რას მეტყვით ამაზე? ზურაბის პიროვნებაზე.

გამოიყენა თუ არა ის ე. შევარდნაძემ ჯუმბერ პატიაშვილთან არჩევნების გაყალბებაში. მისი როლი ამ საქმეში? ხომ არ იმოქმედა ამან ქვეყნის განვითარებაზე?

რას გვეტყვით ჯუმბერ პატიაშვილის პიროვნებაზე?

შეეძლო თუ არა მას შეეცვალა ქვეყნის ისტორიის ჩარხის ბრუნვა?

ჯუმბერ პატიაშვილიც ხომ არ გახდებოდა ფონდირებული პრეზიდენტი? რუსის მონა?

- ჟვანიას საქმიანობა ჩემს თვალწინ ჩატარდა, მაშინ მე პარლამენტის წევრი ვიყავი, ოღონდ ოპოზიციიდან. იგი ტიპური გლობალისტი იყო, დასავლეთის მითითებების შემსრულებელი და ეროვნული ფენომენის უარყოფელი, საბუთებიდან ქართველის ამოღების მომხრე. ერთხელ ვუთხარი, თუ ეროვნულობის გრაფას არ აღვადგენთ, სამივეს - შენ, ბურჯანაძეს და სააკაშვილს საქართველოს მტრად გამოგაცხადებთ-მეთქი. რა ჩვენი ბრალიაო, ამ საკითხს შევარდნაძე აჩერებსო.

აბა, თუ ასეა, ნავიდეთ ახლავე შევარდნაძესთან-მეთქი.

რა საჩქაროა, ენა დაება სააკაშვილს. დავრეკე ჟვანიას კაბინეტიდან. შევარდნაძემ ყურმილი მაშინვე აიღო. ბატონო ედუარდ, თქვენთან მოსვლა გვინდა-მეთქი, ჩამოვუთვალე გვარები. მობრძანდითო.

მივედით ოთხივენი. შევარდნაძემ ხელის ჩამორთმევისთანავე დაიწყო!

- კაცო, - მიმართა სააკაშვილს, ჟვანიას და ბურჯანაძეს, - რატომ მამდურებთ შარაძეს და მიშველაძეს, მე ვაჩერებ ეროვნების საკითხს? რა გინდათ ჩემგან?

მერე მე მომიბრუნდა: - რეზო, ამისხენი ერთი რა ხდება. სხვა ქვეყნებში როგორაა ამ მხრივ საქმე.

- ზოგი ქვეყანა ძველი სისტემის ერთგულია, ყველა მოქალაქეს თავის ეროვნებას უწერენ, ზოგან კი ძირითადი ანუ ავტონომიური ერის ეროვნებაა მითითებული-მეთქი.

- მაგალითად? - შევარდნაძემ მკითხა.

- მაგალითად, საფრანგეთში ყველა მოქალაქეს „ფრანგი“ უწერია-მეთქი პასპორტში. თქვენ რომელს ემხრობით, ბატონო ედუარდ-მეთქი?

- მე ძველი კაცი ვარ და ძველ სისტემას ვემხრობი. ყველას თავისი ეროვნება ჩავუწეროთო, შევარდნაძემ.

გამოვედით შევარდნაძის კაბინეტიდან. მე გამარჯვებულის იერით, იმათ დანა პირს არ უხსნიდა.

ამაოდ ველოდი საქმის დაბოლოებას. არ შეასრულა „სამეულმა“ შევარდნაძის მითითება.

თურმე მაშინ უკვე გადაწყვეტილი ჰქონდათ შევარდნაძის დამხობა.

რაც შეეხება ჯუმბერ პატიაშვილს, მან ბევრი სასარგებლო საქმე გააკეთა.

მარტო ის რად ღირს, რომ საკათალიკოსო გააძლიერა და ქართულ ეკლესიას მინების გადაცემით ძლიერი ეკონომიური საყრდენები შეუქმნა.

იგი თხემით ტერფამდე ქართველი პატრიოტი იყო და მახსოვს, მუხლჩაუხრელად რომ იბრძოდა მკვდარი ქართული სოფლების გასაცოცხლებლად, მაგალითად, უდაბნო. აგრეთვე მინისძვრით დაზარალებული სვანების მარნეულში ჩამოსასახლებლად.

მისი უანგარო მუშაობა და მაღალი ავტორიტეტი ვერ შეარყია იმ სამხელემა პროვოკაციამ, რაც კრემლმა მოუწყო ცხრა აპრილის ხოცვა-ჟლეტის სახით.

- მემუარებში თქვენ თვითონ სვამთ კითხვას: არის საერთოდ ქართველი კაცი მებრძოლი?

იქნებ უფრო ვცლად მოგიყვებთ ამ კითხვის გარშემო.

მე შემოიძლია მოგიყვანოთ ერთი მაგალითი ამ თემაზე, როდესაც რუსეთმა 2008 წელს მოახდინა ფოთისა და სენაკის ოკუპაცია, სენაკის გარნიზონიდან ქართული ჯარი გაიქცა, ამ სიტყვის სრული მნიშვნელობით, დაიძალნენ ახლომდებარე სოფლებში და ტყვეებში, მათი ერთი ასეული ჩვენს მშობლიურ სოფელშიც გაიხიზნა.

გამოდის, რომ რუსებს რომ გზა გაეგრძელებინათ, ასევე ჩაბარდებოდა ქუთაისიც, სამტრედიაც, ბათუმიც და ა. შ.

თქვენი აზრით ვისი ბრძანებით მოხდა ეს ფაქტი?

თუ შიშმა იმოქმედა?

ისტორიას ახსოვს მტრის ბევრი შემოსევა, მაგრამ უბრძოლველად გაპარვა და დამალვა ნაკლებად მსმენია.

გთხოვთ უპასუხოთ თქვენივე დასმულ კითხვას.

- ჩემი გული ვერ იჯერებს ეჭვს თანამედროვე ქართველის ნაკლებ ბრძოლისუნარიანობის შესახებ, მაგრამ ფაქტი ჯიუტია. ანწუხელიძის და ძმათა მისთა თავდადების ფაქტებს რომ ვიხსენებ, ვრწმუნდები, რომ ვცდები, თუმცა ხანდახან ვფიქრობ, 250 წლიანმა „მშვიდობამ“ ხომ არ დააჟანგა ქარქაში მამა-პაპური ხმალი. თქვენს მიერ მოტანილი სამდღიანი ომის სამარცხვინო დასასრულის მაგალითიც ამას მოწმობს. სად გაექცევა ისტორია მეთერთმეტე არმიის შემოსვლის დროს თბილისელები ფარდის ღრიჭობიდან შიშით რომ შესქეროდნენ ოკუპანტ არმიას, დავივიწყოთ ტაბახმელაში უპატრონოდ მიტოვებულ იუნკერთა მისახმარებლად ხელი რომ არავინ გამოიღო, დავივიწყოთ ცხინვალში 50 ახალგაზრდა პოლიციელი, ნუ დავგზოცავთო და უყოყმანოდ მუხელზე რომ დაეცა? დავივიწყოთ მტრის ვერტიფერინის გუგუნის გაგონებაზე სამარცხვინოდ ასფალზე მხოხავი მიხილ სააკაშვილი?

აი, რატომ არის საჭირო, რომ საქართველოში გავაძლიეროთ სამხედრო პატრიოტული აღზრდა.

- მოუხდა თუ არა ვინმემ ბოდიში ქართულ მწერლობას და უნივერსიტეტის განთავისუფლებულ პროფესორს?

ან თუნდაც სინანული თუ გამოთქვა ვინმემ?

რა იყო ეს? თავის გამოჩენა თუ შურისძიება? და რის გამო?

თქვენი აზრი, ბატონო რევაზ.

- სააკაშვილმა ერთი ბრძანებით ერთბაშად დაითხოვა უნივერსიტეტიდან 2447 ეროვნულად მოაზროვნე ყველა თანამშრომელი. სახელოვანი პროფესორები ქუჩაში დარჩნენ სრულიად უსახსროდ და უპატრონოდ.

მერე კარგა ხანს ერთმანეთს ცვლიდნენ ნაცრექტორები, მაგრამ არც ერთს არ მოსვლია თავში მეცნიერი მამებისთვის უკან დაბრუნება ან ბოდიშის მოხდა. სამწუხაროდ, დღესაც ასეა.

საკაშვილმა უნივერსიტეტზე შური იძია, რადგანაც ქართულ წერაში სამიანი მიიღო და იურიდიულზე ქულები არ იყო. ამ ქულებით კიევში ჩარიცხეს საერთაშორისო იურიდიულზე, საიდანაც მოსკოვის კაგებეს დაუკავშირდა და სამხრეები მოივლო.

საკაშვილის შურისძიების მსხვერპლი პროფესორების 90% დღეს ცოცხალი აღარ არის.

არ არის ეს დანაშაული? რატომ ამაზე არ მოთხოვეს პასუხი ჭკუანადრძობ პრეზიდენტს?

- ყველასათვის ნათელია, რომ ყველა სახელმწიფოს ჰყავს საზღვარგარეთ ძლიერი დიასპორა. ჩვენც გვყავს ბევრ ქვეყანაში ძლიერი ქართველობა, ჭკვიანი და განათლებული დიასპორა კი ძლიერი ძალაა, მათ ბევრი რამ სასარგებლოს გაკეთება შეუძლიათ ქვეყნისათვის, თავისი სამშობლოსათვის.

ბუნებრივია თქვენ ასეთ ხალხს ბევრს იცნობთ და მეგობრობთ მათთან. მეც რიგით ქართველს მყავს რამოდენიმე, რომელთანაც მეგობრობა მაკავშირებს. მათგან მხოლოდ ერთს დავასახლებ საკითხის გავრცობისათვის და სინათლის შემოტანისათვის.

შვედეთში არეულობის წლებში თავის მეუღლესთან და სამ ვაჟთან ერთად ემიგრაციაში ჩარჩა ქუთაისელი გოგონა ლელა კუხიანიძე.

ლელამ, რომელიც მოძრავი და ბეჯითი გოგონაა, განსაკუთრებულ შედეგს მიაღწია, შვედეთში დააარსა ქართულენოვანი სკოლა. მიიზიდა ემიგრანტი პედაგოგები და სრულიად უსასყიდლოდ ქართულს ასწავლის სამშობლოდან გადახვეწილ ქართველთა ბავშვებს, ასევე ჩამოაყალიბა ანსამბლი „ნერგები“, სადაც ასწავლის მუსიკას და ცეკვას (თვითონაც ქალბატონი ლელა მუსიკოსია).

მისმა შემართებამ სწრაფად მოიპოვა პოპულარობა და სიყვარული.

ლელა დღე და ღამეს ასწორებს, რომ უფრო გააფართოვოს მუშაობა, მისწვდეს ქვეყანაში მყოფ თითოეულ ემიგრანტს და აკეთებს სასარგებლო საქმეს, იგი იბრძვის ქართული გენის შენარჩუნებისათვის, ქართული სულის ამალღებისათვის იმ შორეულ ქვეყანაში.

მე ქედს ვიხრი ქალბატონი ლელას წინაშე. დაუფასებელია მისი ღვაწლი. ასეთი ადამიანები სხვაგანაც ბევრი გვეყოლება.

ბატონო რევაზ!
თქვენ, როგორც ყოფილ პარლამენტარს მინდა გკითხოთ:

არის თუ არა ქვეყნის ბიუჯეტში გამოყოფილი სახსრები დიასპორასთან მუშაობის მიმართულებით?

არსებობს თუ არა სახელმწიფო ნება და პოლიტიკა ამ მიმართულებით?

ალირიცხება თუ არა ემიგრაციაში მყოფი ქართველები, რომლებიც ქვეყნისათვის სასარგებლო საქმეს აკეთებენ?

გაგვაჩნია თუ არა დიასპორასთან მუშაობის ცენტრი?

თუ არ არის ეს ცენტრი, მთავრობამ უნდა მიხედოს ამ საკითხს.

რას გვეტყვით, ბატონო რევაზ? გაგვიზიარეთ თქვენი მოსაზრება.

- მეც გამიგია ქალბატონი ლელა კუხიანიძის სასარგებლო ეროვნული საქმიანობის შესახებ და მიხარია რომ თქვენი ნაცნობი ყოფილა.

რაც შეეხება „ახალ ემიგრაციას“ საერთოდ, გულახდილად რომ გითხრათ, არ ვიქნები გულწრფელი, რომ გითხრათ, საქართველოს გარეთ ქართველების ყოფნას მივესალმები-მეთქი.

საკაპშილის ბნელი საქმეების გადაძვირებული ქართველების შიმშილისაგან გაქცევის მიზეზი მე კარგად ვიცი, მაგრამ ახლა სხვა დროა, დღევანდელმა ხელისუფლებამ მშვიდობასაც მიაღწია და ცხოვრების დონის საგრძობლად ამაღლებასაც.

მართალია, ქონი არც ახლა გადაგვიდის კისერზე, მაგრამ ვურჩევ ყველა ემიგრანტს, დაბრუნდით თქვენს მიწაზე. ხომ ხედავთ, თქვენს მიტოვებულ ეზო-კარს რუსი ევატრონება.

ჩვენ ჩვენი ეთნოსის, ჩვენი რჯულის და სისხლ-ხორცის, ჩვენი ტომის წარმომადგენლები გვჭირდება. უცხოელი ვერ მოუფ-

ლის „ვეფხისტყაოსანს“ და „ვარძიას“.

ამიტომ ჩამოდით და ერთად ვიბრძოლოთ უკეთესი საქართველოსთვის.

დიასპორისთვის ბიუჯეტში გამოყოფილი კაპიკები, რასაკვირველია, ზღვაში წვეთია.

- გალაკტიონ ტაბიძეს თქვენ მეოცე საუკუნის პოეზიის ზევსი უწოდეთ.

მე პირადად დიდ პატივს ვცემ მის შემოქმედებას. ასევე ყოველთვის პატივისცემით მოვიხსენიებ გალაკტიონის მეუღლეს ოლა ოკუჯავას.

მე მემამაყება, ბატონო რევაზ, რომ ქალბატონი ოლა უკუჩავს ოდაბადე სოფელი თამაკონია. დიახ, სოფელი თამაკონია.

მოკლედ ხომ არ გვეტყოდით ბატონი გალაკტიონისა და ქალბატონი ოლა ოკუჯავას სიყვარულზე რამეს? ოლას ტანჯულ ცხოვრებაზე?

ასევე მინდა გითხრათ, რომ სოფელი თამაკონია ოდაბადე მოსკოვში მოღვაწე ბულატი ოკუჯავასი. იგი ოლას ბიძაშვილად ერგებოდა. ბულატი იყოს საზოგადო მოღვაწე, მომღერალი, გიტარისტი და ძლიერ განვითარებული პიროვნება. მას პატივს მიაგებდა მთელი მოსკოვი და რუსული საზოგადოება, მისი ელიტა.

ერთი თხოვნა მაქვს, ბატონო რევაზ!

მე მქონდა ბედნიერება მემასპინძლა მოსკოვის უნივერსიტეტის პროფესორ მარატ გიზატულინთან, რომელიც ბულატი ოკუჯავას შემოქმედებას სწავლობს და წიგნები აქვს მასზე გამოცემული.

თავის ნაშრომებში რომ მან შეცდომები არ დაუშვას აუცილებელია ამ პროფესორის მოძებნა.

გთხოვთ თქვენი მოსკოველი ნაცნობების მეშვეობით იქნებ დამაკავშიროთ ამ პიროვნებასთან, რომლის კოორდინატები სამწუხაროდ არ შემომჩნა.

სწორედ მარატ გიზატულინის ჩამოსვლისა და სტუმრობის შემდეგ დავადგინე ჭეშმარიტება და გავაგრძელეთ ძებნა ოლა და ბულატი ოკუჯავას წინაპრების ადგილ განსასვენებელი ადგილის საძიებლად. ახლა ეს ადგილი დადგენილი მაქვს და ამიტომ მინდა მარატთან დაკავშირება. დავადგინე, რომ ეს ადგილი პატარა თამაკონია, რომელიც კომუნისტებმა გაჭედების სოფლსაბჭოს გადასცეს მისი ტერიტორიული სიახლოვის გამო.

პატარა თამაკონის სახელად შენარჩუნებულია და მდებარეობს თამაკონის ჩრდილო აღმოსავლეთ ნაწილში მარტვილის კანიონთან ახლოს. ესაზღვრება თამაკონის მაღალმთიან უბანს „შკანთას“.

- გალაკტიონის ცოლი ოლა ოკუჯავა მარტვილიდან სოფელ თარგამეულიდან ქუთაისში გადასახლებული სტეფანე ოკუჯავას ქალიშვილი იყო. სტეფანეს რვა შვილი ჰყავდა - 6 ვაჟი და ორი ასული. ცოლად პოლონელი ებრაელი ესვა. ეს უკანასკნელი რუსულენოვანი გახლდათ და შვილებმაც რუსული სკოლა დაამთავრეს. გამოხდა ხანი და ეს ქუთაისელი „ურის ბიჭები (ასე ეძახდნენ დედის გამო) ცნობილ ბოლშევიკ-რევოლუციონერებად იქცნენ. 1937 წელს წითელმა ტერორმა ან უკვე მაღალი თანამდებობის მქონე ოკუჯავები თითქმის ყველანი დახვრიტა. მოგვიანებით დააპატიმრეს და მინსკის მახლობლად მედვედევის ტყეში დახვრიტეს ოლა ოკუჯავაც. ცეკას მდივნის მიხეილ ოკუჯავას შვილი იყო მეცნიერი ვაჟა ოკუჯავა (ჩემ დროს თსუ-ს რექტორი გახლდათ), ხოლო ბულატი ვიქტორის ძე ოკუჯავა ადრე თბილისის უნივერსიტეტში სწავლობდა და მერე მოსკოვში გადავიდა, დედა სომეხი ჰყავდა, ქართული კარგად იცოდა.

ვისოცის მსგავსად ბულატი თავის ლექსებს გიტარაზე ამღერებდა

და მოსკოვის ახალგაზრდებში პოპულარობაც მოიპოვა, როგორც მწერალი დიდი ვერაფერი იყო.

- მსოფლიო დუმს, ნაბიჯს არ დგამს საქართველოს გადასარჩენად.

რა იქნება ხვალ?

„მალე გათენდება ღამე საზიზღარი?!“ თქვენ თვითონ სვამთ ამ კითხვას, ბატონო რევაზ!

ამ სიტყვების დაწერიდან 25 წელი სრულდება.

ახლა რა აზრისა ხართ?

გთხოვთ უპასუხოთ თქვენივე დასმულ კითხვას.

- საქართველო ბენვის ხიდზე გადის. მსოფლიო ძალიან ამღვრეულია. მესამე მსოფლიო ომის პარამალზე ვდგავართ.

კიდევ ერთი პატრუქის გაკვრა და ერთ მუშტად შეკრული მუსლიმანური სამყარო საქრისტიანო მსოფლიოს დაერევა.

ახლა, ამ წუთში რუსეთი რომ საქართველოში ტანკებით შემოვიდეს, ჩვენთვის თავს არავინ გამოიღებს. ზღაპარია ყველაფერი... მათ შორის ევროკავშირიც და გაეროც.

ჩვენს ხელისუფლებას დიდი პოლიტიკური ალღოიანობა დასჭირდება, რომ საქართველო არ გაისრისოს.

ღმერთიც უნდა შეგვეწიოს. მაგრამ მხოლოდ ლოცვის იმედად ნუ ვიქნებით.

საინტერესოა შოთა ნიშნიანიძის წერილი ედუარდ შევარდნაძეს.

ხომ არ იცით როგორი რეაქცია ჰქონდა ფონდირებულ პრეზიდენტს შოთას წერილზე?

- შოთა ნიშნიანიძე ჩემი უპირველესი მეგობარი იყო და პირად საუბარში ჩემთანაც ხშირად უთქვამს, რა გვიქნა ამ ხელისუფლებამ, თავმოყვარე მწერლები ყაჩაღი მილიონერების ხელში მათხროვრებად გვაქციაო.

იმ „წერილზე“ შევარდნაძეს შოთასთვის ოფიციალური პასუხი, რამდენადაც ვიცი, არ გაუცია.

ისე კი, ეწყინებოდა, რა თქმა უნდა.

შედეგი? მალე მწერალთა კავშირის თავმჯდომარეობიდან შოთა ნიშნიანიძე მოხსნეს და გიორგი ციციშვილი (!) დანიშნეს.

მე მგონი, ამით ყველაფერია ნათქვამი.

- მე მიყვარდა მურმან ლებანიძე, როგორც პიროვნება. მის ლექსებზე მაინც და მაინც არ ვგიჟდებოდი.

შემძაგდა ეს კაცი.

ხომ არ ჩაღრმავებხართ ამ თემას.

ვინ იდგა მის უკან?

თუ მურმან ლებანიძის ნაცოდვილარი იყო მეგრელებზე დაწერილი ლექსი?

- თუ გახსოვთ, მურმანის ამ ლექსს პირველებმა მე და ოთარ ჭითანავამ გავვეცით პასუხი.

მურმანის უკან არავინ იდგა.

ეს მისი შეხედულება იყო.

პირად საუბარშიც ბევრჯერ გვიკამათია, ცოტნეს გმირობის არ მჯერაო, მეუბნებოდა.

საერთოდ პოეტიც კაცია და შეიძლება შეეშალოს, მკაცრად ნუ განესჯით ამისათვის.

მურმანის უკეთესი ლექსები გავისენოთ.

კარგი პოეტი იყო.

- იქნებ ლევან ბერძენიშვილზეც გვითხრათ ორიოდ სიტყვა.

რას აბოლებს ეს კაცი?

- მე მგონი, პოლიტიკიდან ლიტერატურაში გადასული ლევანი ყველაფერს აკეთებს იმისათვის, რომ გახმაურდეს, თუნდაც ყველა ბრუნვაში მოიხსენიონ.

აბა, რა ჭკუა უნდა მოთხოვო კაცს, რომელიც იტყვის, ილია ჭავჭავაძეს, როგორც მწერალს, არ ვიცნობო.

საერთოდ, ვისწავლოთ ქართველებმა თუნდაც მცდარი კაცის ატანა. მაშინვე ყელში ნუ ვწვდებით ხოლმე. ეშლება? გავუსწოროთ.

მაშინვე დედის გინებაზე ნუ გადავალთ.

ვთქვით გზადაბნეულია, მაგრამ ხომ ჩვენი, ქართველი გზადაბნეულია.

„ძე შეცთომილი“ გაიხსენეთ სახარებიდან.

- ბატონო რევაზ, ხელისუფლებამ გაქურდა მოსახლეობა. ეს კითხვა უამრავ ადამიანს აინტერესებს.

მეანაბრებზეა საუბარი.

ხომ არ დადგა დრო ნაქურდალი პატრონს დაუბრუნდეს.

თქვენ რა აზრისა ხართ, ბატონო რევაზ?

ოტია იოსელიანი განსაკუთრებით უყვარდა ქართველ ხალხს.

„დავედით თხლებუო“ ოტიას სიტყვებია.

ბატონო რევაზ!

არასოდეს მოგვწყინდება ოტიაზე მოგონებების მოსმენა.

იქნებ მოგვიყვით რატომ დაენანა ხელისუფლებას მისი სიყვარულით გაცნობა უკანასკნელ გზაზე.

თქვენ მას ქართული ლიტერატურის „ოთარანთ ქერივი“ უწოდეთ.

ვიცი, რომ ოტიასთან მეგობრობდით. რამეს ხომ არ გაიხსენებდით ახალს?

- ოტია იოსელიანი 75 და 80 წლისთვის იუბილეებზე მთავარი მომხსენებელი მე გახლდით და უკანასკნელ გზაზეც გაცილებისას სამგლოვიარო მიტინგი მე მიმყავდა.

ჩემი ძვირფასი მეგობარი იყო.

მართალი ხართ, მის დაკრძალვაზე ხელისუფლების არცერთი წარმომადგენელი არ მოვიდა.

ერმა და ეკლესიამ სათანადოდ დააფასა.

გელათის ტაძრიდან გამოვასვენეთ. ასეთი რამ არც მანამდე და არც შემდეგ არცერთ მოღვაწეს არ ღირსებია.

- „ქართული პროზის რაინდის“ წოდება მოგენიჭათ 2010 წელს.

მე ეს ჯილდო მიმეჩნია უმაღლეს შეფასებად თქვენი შემოქმედების.

მოგვიყვით ცოტა რამ ამ საინტერესო ჯილდოზე.

როდის დაარსდა?

ვინ დაარსა?

ვინ მიიღო პირველად ეს ჯილდო?

რამდენს აქვს მიღებული?

ამჟამად თუ ხდება ამ ჯილდოს მიკუთვნება?

- ჩემი შემოქმედების და საერთოდ მწერლის შემოქმედების უმაღლეს შეფასებად, მე თუ მკითხავ, ჩემო ბურდა, რუსთაველის პრემია მიმეჩნია, რომელიც 1999 წელს მომინიჭა.

რაც შეეხება „რაინდის“ წოდებას, იგი 2001 წელს დაარსდა და დღემდე მწერალთა და ხელოვანთა თითზე ჩამოსათვლელ ჯგუფს აქვს მიღებული. პირველად ოთარ ჭილაძემ მიიღო.

ამ ერთი თვის წინათ ქართული პოეზის რაინდის წოდება მიიღო გორში მცხოვრებმა პოეტმა აკაკი ბიძინაშვილმა პოემისათვის „ტკივილი“. პოემა გალაკტიონის და ოლა ოკუჯავას ტრაგიკულ სიყვარულზეა დაწერილი.

- ბატონო რევაზ, დიდი მადლობა საინტერესო საუბრისათვის. ამ საუბარს სიამოვნებით გავაცნობ თქვენი სახელობის ბიბლიოთეკის მკითხველებს თქვენს მშობლიურ თარგამეულში.

სახელგანთქმულ პოემა „სადღე-გრძელოში“ ბრწყინვალე პოეტი გრიგოლ ორბელიანი თითო მახვილი ეპიტეტიტ ახასიათებს ქართველ ტომებს. მესხი კაცი კი ასეა წარმოჩენილი: „მესხი სწავლითა ქებული!“

ეს „სწავლით ქებულობა“ მრავალ რამეში მჭვირვალეებს: ყველაზე მნიშვნელოვანი მწერლები ამ მხარეს მოუცია ქვეყნისათვის. მხოლოდ „ვეფხისტყაოსნის“ ბოლოში ჩამოთვლილთაგან რამდენია მესხი: „აბდულმესიას“ ავტორი შავთელი, „დილარგეთიანისა“ და „ვისრამიანის“ შემოქმედი სარგის თმოგველი, „ტარიელიანის“ ავტორად შერაცხული რუსთველი და, ბოლოს, „ვინმე მესხი მელექსე“, დაუვინყარი სიტყვების ავტორი:

გასრულდა მათი ამბავი
ვითა სიზმარი ღამისა.
გარდახდეს, გავლეს სოფელი,
ნახეს სიმუხთლე ჟამისა!
ვის გრძლად ჰგონია, მისთვისცა
არის ერთისა წამისა.
ვსწერ ვინმე მესხი მელექსე
მე რუსთველისა ღამისა.

ამას მიუმატეთ არაერთი გამოჩენილი სარდალი და მათი გმირობა; ახლა გავიხსენოთ სასულიერო პირები და მათი „საქმენი საგმირონია“. ჯერ მარტო გრიგოლ ხანძთელი და ძმანი მისნი რას იქმოდნენ ამ საოცარ მხარეში, ახლა ჯერ კიდევ VIII-IX საუკუნეებში კათალიკოსის დონეზე აწეული მანყვერელი და მანყვერლობა გავიზაროთ.

და ყოველივე ნათელი გახდება: წარსულით უზომოდ აღტაცებული რომანტიკოსი ამ შემთხვევაში არაფერს აბუქებს, არ ამატებს, არ აიდვალვებს. მისი შეფასება მისხის მისხით აფთიაქის სასწორზეა ანონილ-გაზომილი!

ამის კიდევ ერთი დასტურია შესანიშნავი პოეტისა და საზოგადო მოღვაწის ავთანდილ ბერიძის რუდუნებითი ნამუშევარი – მესხური ფოლკლორის II უზარმაზარი ტომი (I ტომი ამ რამდენიმე წლის წინათ გამოვიდა).

მესხური ფოლკლორის კვლავ გამოზრუნეობაში ბატონ ავთანდილს

ფრიად და ფრიად დახმარებიან მწერალი და პედაგოგი სოსო გიქოშვილი, სახალხო მთქმელი ანტონ ბალახაშვილი, ისტორიკოსი რეზო ანდლულაძე, პოეტი ვაჟა სამსონიძე.

ტომში ფართოდ არის წარმოდგენილი გამოცემებსა და კრებულებში მიმოხეული მასალები, რომლებიც თავის დროზე მოიძიეს, ჩაიწერეს და დასტამბეს იაონე და კონსტანტინე

მესხური ფოლკლორის კვლავ გაზრუნეობა

*„მესხი სწავლითა ქებული“
გრ. ორბელიანი*

გვარამაძეებმა, ვასილ კოპტონაშვილმა, ილია ალხაზიშვილმა, სერგი მაკალათიამ, ივანე ბარიკალაშვილმა, ნაზირა ვაჩნაძემ...

ერთობ საინტერესოა ცალკე განყოფილებად წარმოდგენილი ეპიტაფიები და შელოცვები.

შემდგენელი ბატონი ავთანდილ ბერიძე გულდანყვევით დასძენს: დანამდვილებით ვიცით, ბევრი სხვა მასალაც არსებობს, ოღონდ ჯერჯერობით ვერ აღმოვაჩინეთ.

ვაცხადებ: დასტურ ასეა!

მე პირადად კოხტად გაფორმებული და სუფთად გადანერილი ლექსებით, ლეგენდებითა და თქმულებებით სავსე მთელი ერთი სქელი რვეული ჩავაბარე თბილისის უნივერსიტეტს 1968 თუ 1969 წელს და ის მასალები ამ კრებულში არა ჩანს.

ვინ იცის, ჩემსავით რამდენმა ჩაიწერა მესხეთში მივიღინებისას ფოლკლორული ნიმუშები. მათი დაკარგვა არ ეგების!

პოეზიის გურმანი, თუნდაც ის იყოს მურმანი, თვალს ვერ მოარიდებს ასეთ პოეტურ ნაპერწკალს: „სიყვარული ორის თავდავიწყებული თამაშია“ (14); თუმცა კი ხიფათივით გაფურბივარ წერილის მოცულობის გაზრდას, არ შემიძლია არ მოვიყვანო ეს სტროფი:

ვთქვი, თუ სიტყვას ვემსახურო,

ღამის გასკდეს ბოლმით გული;
სად ნუხილი, სად მეჯლისი,
სასმისების წკარანკური! (26)

აშულ ბაბაის ვერც ამ აღმონათქვამს ჩავუარე გულგრილად:

ამის გამო ჩამიბნელდა ტყე-ველი,
უყარბოდ რა ვარ, განანირი მე,
ცრემლთა გუბეს ვეზიარე, ვტირი მე,
დედი, მუნჯი ვიყავ, რატომ ამამე-

ტყველე?! (31)

მთქმელ ნიკოლოზ ზაზაძესაც რა კარგად უთქვამს, რაც უთქვამს:

გალმა გავალ, გამოგიტან ბეჭედსა,
შალს გიყიდი, დაგიმშვენებ ბეჭებ-სა (34).

გონება მიწყრება, ძუნნად უნდა მოიხმო ნიმუშებიო, ოღონდ გული არა და არ მანებებს ამას. სული ტკბილია და აი, ესეც, კიდევ ერთი, ჩემი ფიქრით, მარგალიტი სახალხო მთქმელ ვლადიმერ ბერუაშვილის „დივანიდან“:

არ მიცინის გულის სატრფო,
კისკისით რომ მოვიდა;
ერთ დროსაც რომ მთლად გამძარცვე

ქონებიდან, ყოფიდან.
მუხანათო, ჰა სიცოცხლეც!
- ვითომც სულ არ ყოფილა,
რალად მიწდა, შენი იყოს,
ღიმილიც არ მაცალე (52).

მთქმელ ბერუაშვილის არაერთ სხვა მწველ ტაეპს დანანებით გამოვემშვიდობები და სალლიცინო-სახუმარო კუპლეტებს წავეტანები:

დედამ კაბა შემიკერა,
მოკლე იყო, ლენტიანი;
ოცდახუთი მერიგება
შენისთან რეტიანი (75).

არც ვაჟის პასუხია ურიგო:
ამოდუღდი, მარგალიტო,
საგუბარში ჩადექ წყალო!

არც ისეთი ღამაში ხარ,
რა თავს იმაღლები, ქალო?! (93)

ზოგ ხალხურ ლექსს აშკრად ატყვია გრ. ორბელიანისა და აკაკის ზეგავლენა. ეს არც გასაკვირია: ზოგი მთქმელი მოესწრო სკოლაში აკაკისა და გრიგოლის პოეზიის შესწავლას. კრებულში, როგორც მოსალოდნელი იყო, ბევრია მასალა შოთა რუსთველზე, თამარ მეფეზე; საკმაოდაა ასახული ზარზმის რეგიონიდან მოსახლეობის მიგრაცია გურიაში. აქვე დავსძენ: სოფ. შემოქმედში შემოქმედის ტაძრის ეზოში აღმართულია ტაძარი ზარზმა – ზარზმიდან გადმოტანილი ეკლესია. და, ხალხი რომ გადმოსახლებულიყო თურქთა მონოლის გამო, რა გასაკვირია?! ერთობ საგულისხმოა, რომ სამცხეშიც ყოფილა ტოპონიმი ჩოხატაური ამ ფორმით ჩახატაური (1023).

ამრიგად, კიდევ ერთი ტოპონიმი იხდის ჩადრს: გურული ჩოხატაური მეორეული ტოპონიმი, პირველადია მესხური ჩახატაური, სწორედ ისე, როგორც გურიის დედაქალაქი ოზურგეთი მიღებულია სამცხის დედაქალაქისაგან ოძრხე. ფონეტიკური პროცესი ასე წარმართა: ოძრხე ოძურხე ოღზურხე ოზურხე ოზურხეთი ოზურგეთი.

ამ დიდ ნიგნს უნდა შევკადრო მცირე შენიშვნები: ბევრი ლექსი და ფოტოსურათი მეორდება (348, 349, 351, 353); მოუნესრიგებელია პუნქტუაცია; გოჰარი (9) განმარტებულია, როგორც ძვირფასი, სინამდვილეში მარგალიტია; აფორიზმი „ცემა გმართებს გამზრდელისა“ (419) რუსთველის კი არაა, არამედ – ვახტანგ მეექვსისა; ასევე აფორიზმი „საცა არა სჯობს, გაცლა სჯობს“ (421) „ვეფხისტყაოსანში“ არსადაა, იგი ხალხურია.

ქართველი ხალხი მარად მადლიერი დარჩება ბ-ნი ავთანდილ ბერიძისა და მისი გუნდისა. მათ ხომ კიდევ ერთხელ გვაზიარეს ხალხურ საუნჯეს, რომელსაც დაბერება არ უწერია.

მურმან თავდიშვილი



ოთარ ჭითანავა - 85 ვაჟი

ოთხმოცდახუთისა შესრულდა ცნობილი ქართველი საზოგადო მოღვაწე, პუბლიცისტი და პოლიტიკოსი ოთარ ჭითანავა.

ამ ფრიად ერუდირებული, კეთილადი, უანგარო, ყურადღებიანობით და თავმდაბლობით გამორჩეული კაცის ცხოვრების გზა განათებულია სამშობლოსადმი, თავისი ხალხისადმი მუხლჩაუხრელი სამსახურის ათინათით.

ახალგაზრდობიდანვე ლიდერის თვისებებით დაჯილდოებული ოთარ ჭითანავა ანდამატივით იზიდავდა თანატოლებს და დღესაც არაერთი საზოგადო საქმის წამომწყები და ორგანიზატორი გახლავთ.

ირგვლივ მყოფთ ნიადაგ ზნეობრივ გაკვეთილს აძლევს და ამიტომაც მასთან მეგობრობა ყველას ეამაყება.

წლების განმავლობაში იყო მშობლიური რაიონის - ზუგდიდის ერთ-ერთი ხელმძღვანელი, საქართველოს პარლამენტის წევრი გახლდათ და სამოქალაქო საგუშაგოზე პირველი ვიოლინოს ფუნქციას ასრულებს.

გაოცებას იწვევს უკვე სიჭარმაგის ასაკში მყოფი ოთარ ჭითანავას მეხსიერება. როგორც სიჭაბუკეში ახლაც შეუძლია საათობით ზეპირად გითხრათ ოდენ სტრიქონები კი არა, მთელი თავები ქართველ კლასიკოსთა (განსაკუთრებით გალაკტიონის და კონსტანტინე გამსახურდიას) ნაწარმოებებიდან. მას, ენციკლოპედიური ცოდნის პატრონს, ხშირად მიმართავენ ამა თუ იმ თარიღის თუ ისტორიული ფაქტის დასაზუსტებლად.

ამ საშური თვისებების გამო ბატონი ოთარი საქართველოს არაერთი აკადემიის ნამდვილი წევრია და საზოგადოებრივ საქველმოქმედო უწყებათა სათავეშიც ხშირად ვხვდებით ხოლმე.

იმდენად უწყინარი და მღმობელი გულის პატრონია, რომ წონასწორობას არასოდეს კარგავს. მის მეგობრებს მხოლოდ ერთადერთხელ გვახსოვს გაგულისებულნი, როცა ერთმა პოეტმა, ალბათ მისდაუნებურად, მეგრული ენა ცოტა არ იყოს, აგდებულად მოიხსენია.

საქართველოს ტერიტორიული მთლიანობისათვის მებრძოლი, ერთი აქტიური მეციხოვნეა, რომელსაც მამულის ღირსების საგუშაგოზე უკან არასოდეს დაუხევია.

ულალატო მეგობარს, დიდებულ მამულიშვილს და სანიმუშო ოჯახის პატრონს ოთარ ჭითანავას სულითა და გულით ვულოცავ საიუბილეო თარიღს და ამ უსწორმასწორო წუთისოფელში გაძლებას, გაძლეკვებას ვუსურვებთ.

საქართველოს მწერალთა კავშირი

ჩამო ოთარ!

ოთხმოცდახუთის გილოცავ. ფეხდაფეხ მოგდევ და მეც მალე ვოთხმოცდახუთდები.

ცოტანი დავრჩით ჩვენი თაობიდან. იმ დღეს მითხარი: პატრულმა გამაჩერა და სანამ შენიშვნას მომცემდა, ვკითხე, ჩემი ხნისა თუ კიდევ ზის ვინმე საქსტანმეთქი. გაეცინა, მიბრძანდით, ბატონო ოთარ, ოღონდ ფრთხილად იარეთო.

„ფრთხილად“ არასოდეს გვივლია მე და შენ. ჩვენს თავზეც გადაიარა ამ წუთისოფლის ქაბორიებმა.

რაც შევძელით, ცდა არ დაგვიკლია. სანანებლად ისლა გვრჩება, რომ ყველაზე კარგი ქართული მინები წაგვართვა მტერმა და მის დასაბრუნებლად „კეთილი ნების მსოფლიო“ თითს-თითზე არ აკარებს.

ცოტა ხანს კიდევ გავძლოთ. თითო ყვავილი კიდევ დავვოთ წასულთა საფლავებზე, თითო სიტყვით და რჩევით კიდევ შევეწიოთ ამ აბურღულ ქვეყანას.

მერე... ომარ ხაიამის თქმისა არ იყოს, არც მოსვლა უკითხავს ჩვენთვის ვინმეს და არც წასვლას გვკითხავს.

შენი ძმა რევაზ მიშველაძე

ესმა ონიანის პოეზიის პარამენავტიკული ანალიზი

ესმა ონიანი მრავალმხრივი ნიჭიერებით დაჯილდოებული ადამიანი იყო. იგი გახლდათ უძლიერესი პოეტი, უნიჭიერესი მხატვარი, ესეისტი, მთარგმნელი, ამჟერად მე მასზე როგორც პოეტზე ვისაუბრებ.

როგორც პოეტი, იგი ქართულ პოეზიაში იმ ხაზის გამგრძელებელი იყო, რომელსაც ფილოსოფიურ /ინტელექტუალურ/ პოეზიას ეძახიან. შესაბამისად, იგი ყველა მკითხველისათვის თანაბრად გასაგები და მისაღები არ იყო. მას განათლებული, ინტელექტუალი მკითხველი სჭირდებოდა და სჭირდება. ამიტომაც, რომ იგი ჩვენს საზოგადოებაში ისეთი პოპულარობით ვერ სარგებლობს, რასაც ის თავისი გამორჩეული ნიჭიერებით იმსახურებს. ზოგი მისი თავისებურების მას „გენიალურს“/რენე კლანდია/ უწოდებს. რაც შეეხება ესმაზე როგორც მხატვარზე, დიდი ხელოვანი რეზო გაბრიძაძე მიიჩნევდა, რომ იგი XX საუკუნის მსოფლიოს ერთ-ერთ უდიდეს მხატვარია.

როგორც ინტელექტუალურ პოეტს, ესმა ონიანს მიაჩნია, რომ ნამდვილი პოეზია ისაა, რომელიც ჭეშმარიტების სასახურში დგას. ჭეშმარიტებას უმაღლეს ღირებულებად არისტოტელეს მიიჩნევდა, ოღონდ არისტოტელეს ჭეშმარიტება და ის ჭეშმარიტება, რომელზედაც ესმა ონიანი ლაპარაკობდა ბოლომდე არ ემთხვევა ერთმანეთს. არისტოტელე ცოდნის ჭეშმარიტებაზე, ანუ ობიექტურობაზე, ანუ ადექვატურობაზე ლაპარაკობდა. ასეთ ჭეშმარიტებას გნოსეოლოგიური ჭეშმარიტება ეწოდება. ესმას ჭეშმარიტება კი მხატვრული ჭეშმარიტებაა, ანუ მხატვრული სიმართლეა, მართლის თქმაა, ანუ ისაა, რაზედაც დიდი დავით გურამიშვილი ამბობდა:

„მართალს ვიტყვი, შევიქნები ტყუილისა მოამბე რად“. ერთ-ერთი მთავარი საკითხი, რომელზედაც ესმა ონიანი საუბრობს, არის - რა არის ადამიანი. ხაზს ვუსვამ - რა არის ადამიანი და არა, ვინ არის ადამიანი. ვინ არის ადამიანი, ეს კითხვა მაშინ ისმება, როცა საქმე ეხება რეალურ, კონკრეტულ ადამიანს. რა არის ადამიანი გულისხმობს ადამიანის არსის, ბუნების, რაობის გარკვევას. ასეთ ადამიანზე მსჯელობა ლექსში „მე“. ლექსში პოეტი ლაპარაკობს საკუთარ თავზე, რომელიც კვლავ მოსულა ამქვეყნად, აღმდგარა ხორციტ /„ავისხი ხორცი“/. „ადამიანად მიმილო მიწამ“..

ახლა ვნახოთ, როგორია ეს ადამიანი. რა თვისებები ახასიათებს მას. პირველ რიგში, იგი თავისუფალია, თავისი თავის უფალი. ეს ადამიანის ადამიანობის პირველი მახასიათებელია. როცა ადამიანი თავისუფალი არაა, მას ვერაფრისთვის მოთხოვ პასუხს - ვერც კარგზე და ვერც ცუდზე. საშინელი სამსჯავროს აზრიც ხომ ისაა, რომ ღმერთი ადამიანს თავისუფალ არსებად ქმნის. თავისი თავის უფალი ადამიანი თვითონ ქმნის საკუთარ თავს, ქმნის როგორც სიყვარულით და სიკეთით სავსეს. „ადამიანო, შენ წინ ვარ, მიყვარხარ, მიცან“. „მე თქვენ მიყვარხართ, მე თქვენ მიყვარხართ“.

მე შთაბეჭედ და შთავიბეჭედ სიყვარული და ასე შევქმენით „სულთა შეხების უძლიერესი ხელოვნება“, ამბობს პოეტი.

ლექსში „გარდამოხსნა“ ესმა ონიანი ასე მიმართავს უზენაესს, რომლის სიყვარული, როგორც აღვნიშნე, უპირველესია:

„შენი ხელები, საყვარელო, შენი ხელები.. მონამებრივად თანადგომის, თანგაგების მწველი წყურვილით უსათნოეს სიყვარულით განათებულა“.

ღმერთისადმი აღვლენილი გალობასავით ისმის ლექსი „ვანის ქვაბთა მონასტრის წარწერების გამო“: „ღმერთო, მომეცი ძალა, მომეცი სიმშვიდე,

ღმერთო, დამიფარე, ღმერთო გამიტანე“. ღმერთს ეძღვნება ლექსი „რომელშიც პოეტი ასე მიმართავს მას:

„გაკადნიერდები, შეგთხოვ, წყალობას შენგან მოველი, შენ დაგვიფარე, დაგვლოცე, და გვაპატიე ყოველი“

/აქ იგი ღმერთს თავისი, დედის და დის სახელით მიმართავს/

ხოლო ლექსში „ლოცვა თეთრი გიორგისადმი“ წმინდა გიორგის ასე სთხოვს მორწმუნე პოეტი:

„შენ, წმინდაო გიორგი, გამიხსენი სინათლის, გამიხსენი სიკეთის, სიყვარულის კარიბჭე“.

ესმა ონიანი ჭეშმარიტად ლირიკოსი პოეტია. იგი წერს, პირველ რიგში, თავის თავზე, თავის გრძნობებზე, განცდებზე, ემოციებზე, პირად შთაბეჭდილებებზე, მის ბავშვობაზე, სოფელზე, ნათესაურთა განათებულ ბინაზე... მეთოდი, რომელსაც იგი ამ შემთხვევისთვის იყენებს, თვითდაკვირვების მეთოდია. იგი აკვირდება /იხსენებს/ ბავშვობის სურათებს, ცალკეულ ეპიზოდებს, იმ ადამიანებს, რომლებიც ალაპარაკებდნენ მის ბავშვობას, პირველ

რიგში, ცხადია, დედას. დედა, რომელიც უკითხავს საბავშვო ჟურნალებსა და წიგნებს, მერე მის დას - ორინას. ერთ ადგილას ამბობს: „მე მათ შემოვევლები“. დიდი სიტბოთი და სიყვარულით იხსენებს მოხუც, ავადმყოფ მამას /„ბოლო წუთამდე იყავი ღირსეულად მომკვდავი ადამიანი“, და იქვე: „ღირსეულო, განუკარგავო“. პოეტი ასევე დიდი სიყვარულით იგონებს ბებიასა და ბაბუას. მათადმი დიდ სიყვარულსა და ერთგულებას გამოხატავს. მთელ მის პოეზიაში უარყოფითი პერსონაჟი არაა. მან არ იცის - რა არის შური, ღვარძლი, ბოროთება. მას ყველა უყვარს, ყველას ეთაყვანება, ისე როგორც ის უყვართ ყველას.

თავის პოეზიაში ესმა არსად არ ამბობს, რომ იგი მხატვარია, დიდებული მხატვარი, მაგრამ თავის თავს მაინც იმით „ამხელს“, რომ ყველაფერს ფერებში, სხვადასხვა რაკურსში ხედავს. რაც შეეხება ფერებს, მე არსად, არცერთ პოეტთან, იმდენი ფერი არ შემხვედრია, რამდენიც ესმასთან. მე მათი დასახელება მინდოდა, მაგრამ მალევე მივხვდი, რომ ეს შეუძლებელი იქნებოდა, რადგან ყველა იმ ფერის ჩამოთვლას, რაც ესმას პოეზიაში გვხვდება, ერთი გაზეთი ვერ დაიტევდა. ამ უამრავ ფერთაგან მხოლოდ რამდენიმე ისეთ უცნაურ ფერს დავასახელებ, აქამდე რომ არ გსმენიათ:

წაქისფერი, კაჟისფერი, ფისისფერი, ხახვის ფუჩიჩის ფერი, ჟანგისფერი, ფშატისფერი, ტყლიპისფერი, ხშიადისფერი და მრავალი, მრავალი სხვა.

ესმა ონიანი სვანია და ამაცოხს თავისი სვანობით. „მეამაყება ჩემი გვარი, სვანური გვარი“, შესანიშნავი ლექსებიც აქვს მიძღვნილი სვანეთისადმი. ერთ-ერთი მზისადმი მიმართავა:

„მზეო, დიდო მზეო, მზეო საოცარო, მზეო, სალოცავო, ჩვენო მბრძანებელო“.

ესმა აქებს სვანურ სიმღერებს - ვაჟკაცურს, ძლიერს, ომახიანს, მრავალხმიანს. „გმღერით ჩვენს სიმღერებს, სიმღერებს ცეცხლიანს

ხან მძიმედ მდინარეთ, ხან ნაჭედ-ვერცხლიანს“.

ესმა წერს სვანურ ოქრომჭედლობაზე, ხეზე კვეთის ხელოვნებაზე და ა. შ. გავთლით ხეს თუ ოქროს გავჭედო, ჩვენ ძლიერ სულს ზედ დავაჩნევთ“.

ესმა ონიანს აქვს ბრწყინვალე საბავშვო ლექსები. მათ უკვე საგანგებო ინტელექტის მკითხველი არ სჭირდება. მას ყველა ასაკის ადამიანი /პირველ რიგში, ბავშვები, რასაკვირველია/ წაიკითხავენ. ყველა ეს ლექსი იკითხება ლაღად, სიამოვნებით. დანერვილია ბავშვის ფსიქოლოგიის საუკეთესო ცოდნით. აქ ყველაფერი ზეიმობს, ცელქობს, თვით რითმებიც კი, ხტუნვა-ხტუნვით, თამაშ-თამაშით მიჰყვებიან ერთმანეთს. ესეც ესმას ნიჭიერების კიდევ ერთი გამოხატულებაა. როგორც ჩანს, ესმას ბავშვების გულისთქმაც ზედმინვნით ესმის და ცნობისწადილიც /„ესმას ესმა“/.

ცალკე განხილვას მოითხოვს მისი თარგმანები, განსაკუთრებით კი მისი ესეები. ამ ესეებში ზედმინვნით კარგად ჩანს ესმას საოცარი ნიჭიერება, მისი აზრი პოეზიაზე, ხელოვნებაზე, კულტურაზე, მათ მოღვაწეებზე.

ესმა ონიანს აქვს მისთვის საყვარელი ადამიანებისადმი მიძღვნილი ლექსები. ესენი არიან ფიროსმანი, ტერენტი გრანელი, გალაკტიონი, ოთარ იოსელიანი, გურამ რჩულიშვილი, მანანა გედევანიშვილი.

ესმა ონიანის პოეზია სავსეა ახალი მხატვრული სახეებით, შედარებით, ეპითეტებით მეტაფორებით, პიპერბოლებით, რაც მისი პოეზიის მაღალმხატვრობის დასტურია.

მიუხედავად იმისა, რომ ესმა ონიანი საკმარისად რთულად გასაგები ავტორია და მას, როგორც ზემოთ ითქვა, სათანადოდ მომზადებული მკითხველი სჭირდება, მასზე ბევრი რამ არის დანერვილი. ამ წერილების ავტორები ცდილობენ, რაც შეიძლება ღრმად ჩანდნენ ამ დიდებული ქალბატონის ნაზრევს. ამის მიუხედავად, შეიძლება ითქვას, იგი ჯერ კიდევ არაა სათანადოდ შესწავლილი. შესაბამისად, მისი ბოლომდე გაგება მომავალ თაობებს მოუწევს. რაც ხანი გავა, რაც მეტი ლიტერატურის მკვლევარი დაინტერესდება ესმას ფენომენით, მით უკეთ ნარმოჩინდება მისი „სიდიადე“, მით უკეთ გასაგები იქნება მისი ბრძნული შეგონებები, მით უფრო ამაღლდება და პოპულარული გახდება მისი სახელი. ღრმად ვარ დარწმუნებული, რომ დრო მის სასარგებლოდ იმუშავებს!

რევაზ ბალანჩივაძე, პროფესორ ემერიტუსი, ფილოსოფიის მეცნიერებათა დოქტორი, იაკობ გოგებაშვილის პრემიის ლაურეატი.



ლადო კახაძე - 70

70 წლისა შესრულდა გამოჩენილი ქართველი მწერალი, მეცნიერი და საზოგადო მოღვაწე ლადო გრიგოლის ძე კახაძე. ამის გამო საქართველოს მწერალთა კავშირმა იუბილარს მისალმება გაუგზავნა.

მისალმებაში ნათქვამია:

ბატონო ლადო!

ჩვენო უღალატო თანამოქალაქე!

საქართველოს მწერალთა კავშირი, თქვენი მეგობარი ქართველი მწერლები ღრმა პატივისცემით მოგესალმებიან ჩვენი სამწერლო ოჯახის ღირსეულ წევრს და გილოცავენ დაბადების 70 წლისთავს.

სრულიად საქართველო, უპირველეს ყოვლისა, გიცნობთ, როგორც თანამედროვე ქართული მედიცინის ერთ-ერთ უთვალსაზრისო ნარმომადგენელს, რომელიც ათწლეულების განმავლობაში გამორჩეული მეან-გინეკოლოგი, ულტრაბგერითი დიაგნოსტიკის თვალსაზრისით სპეციალისტი იყავით. სხვადასხვა დროს მუშაობდით თბილისის სამედიცინო ინსტიტუტის მეანობა-გინეკოლოგიის კათედრის კლინიკურ ორდინატორად, სტუდენტთა საკონსტრუქტორო - სამეცნიერო საკვლევო ბიუროს ჯგუფის ხელმძღვანელად, რესპუბლიკური დიაგნოსტიკური ცენტრის ულტრაბგერითი დიაგნოსტიკის განყოფილების ხელმძღვანელად, სამედიცინო ფირმა „ლაფორტუნატოს“ პრეზიდენტად, სადაზღვევო კომპანია „ალდაგი-ბისიას“ კონსულტანტად, სამედიცინო ფირმა „ოქსფორდ-მედიკალ ჯორჯიას“ კონსულტანტად, საქართველოს წმინდა ნინოს სახელობის ექიმთა საზოგადოების თავმჯდომარედ. დიახაც რომ, თქვენი სახელი დაკავშირებულია თანამედროვე ქართული მედიცინის მიღწევებთან, რაც დიდად გვახარებს.

ამავე დროს ნაყოფიერი საზოგადო მოღვაწეც ბრძანდებით. სხვადასხვა დროს არჩეული იყავით თბილისის საკრებულოს თავმჯდომარედ, საქართველოს თვითმმართველობათა ასოციაციის პრეზიდენტად, საქართველოს ეკოლოგიურ მეცნიერებათა აკადემიის წევრ-კორესპონდენტად, საქართველოს ქორეოგრაფიული საზოგადოების პრეზიდენტისა და პატიო წევრად, კრიმინოლოგიური აკადემიის საპატიო აკადემიკოსად, თსსუ საპატიო დოქტორად.

ამჟამად არჩეული ხართ საქართველოს პარლამენტის წევრად, პარლამენტის ჯანდაცვისა და სოციალურ საკითხთა კომიტეტის თავმჯდომარის პირველ მოადგილედ, განათლების კომიტეტის წევრად, ტერიტორიული მთლიანობის აღდგენის დროებითი კომისიის წევრად და მთელ ძალასა და ენერგიას მშობელი ხალხის უანგარო და თავდადებულ სამსახურს ახმართ.

გვიხარია, ძალიან გვიხარია, რომ ასეთი ერისკაცი, მრავალმხრივი, ფართო დიაპაზონის მქონე პიროვნება ჩვენი სამწერლო ოჯახის წევრიცაა.

ქართულ მწერლობაში 1991 წელს შემოაბიჯეთ, როცა გაზეთ „ახალგაზრდა კომუნისტი“ დაიბეჭდა თქვენი პირველი ლექსი „მეზობლე ეზოს გვის“. მას შემდეგ თქვენი ლექსები პერიოდულად ქვეყნდება ქართულ პერიოდიკაში, გამოდის ცალკე წიგნებად.

თქვენი პოეტური კრებულები „ფიქრები გაბზარული სარკის წინ“, „გმადლობ, ბოდიში“, „ანამწევის ამნეზია და ამნეზიის ანამწევი“, „სალამი, იარაღი, ანუ ერთხელ წამიკითხე“ გულთბილად მიიღო ქართველმა მკითხველმა, რადგანაც ამ ლექსებიდან საოცარი სითბო და სიყვარული იღვრება. მათი ავტორი ხომ ღვთიური მადლისა და მისიონის, სიკეთისა და კეთილშობილურ რაინდად გვევლინება, რაც ასე აკლია მეტისმეტი პრაგმატიზმით აღსავსე სამყაროს. თქვენი ლექსების ლირიკულ გმირს გული უკვდება იმის შემხედვარეს, თუ როგორ იმსხვერვეა შურისა და ღვაძლის შხამიან კედლებზე სათნოების მახვილები და მზადაა თავად ჩაებას ამ უთანასწორო ომებში. ქართველთა გათითოკაცებისა ეშინია და ერსა და ბერს გაერთიანებისაკენ, ერთ ხორცად და ერთ სულად შეკვრისკენ მოუწოდებს...

ბატონო ლადო!

თქვენი მრავალწლიანი და შეუბღალავი მოღვაწეობა ღირსების ორდენით - საქართველოს ერთ-ერთი უპირველესი ჯილდოთი აღინიშნა. დაჯილდოებული ხართ დავით აღმაშენებლის სახელობის პრემიით, მონიჭებული გაქვთ ქართული კულტურის რაინდის ნოდება, არჩეული ხართ თბილისის საპატიო მოქალაქედ.

კიდევ ერთხელ გულითადად გილოცავთ საიუბილეო თარიღს ძვირფას მეგობარს, დიდხანს სიცოცხლეს, ჯანმრთელობას და დიდ ადამიანურ ბედნიერებას გისურვებთ.

საქართველოს მწერალთა კავშირი



ნუნუ დალაქიშვილი - 70

70 წლისა შესრულდა ცნობილი ქართველი მწერალი და ჟურნალისტი ნუნუ გრიგოლის ასული დალაქიშვილი. ამის გამო საქართველოს მწერალთა კავშირმა იუბილარს მისალმება გაუგზავნა. მისალმებაში ნათქვამია:

ძვირფასო ქალბატონო ნუნუ!

საქართველოს მწერალთა კავშირი, თქვენი მეგობარი ქართველი მწერლები სიყვარულით მოგესალმებიან ჩინებულ შემოქმედს და გილოცავენ ღირსშესანიშნავ თარიღს თქვენს ცხოვრებაში - დაბადების 70 და ლიტერატურულ-შემოქმედებითი მოღვაწეობის 50 წლისთავს.

თქვენი ლიტერატურული დებიუტი 1972 წელს შედგა, როდესაც გაზეთ „ახალგაზრდა კომუნისტი“ გამოაქვეყნეთ პირველი ლექსები.

მას შემდეგ თქვენი ნაწარმოებები - ლექსები, მოთხრობები, ჩანახატები, მხატვრული ნარკვევები, პუბლიცისტური წერილები პერიოდულად იბეჭდება ქართულ ჟურნალ-გაზეთებში, გამოდის ცალკე წიგნებად.

გულწრფელობა, ემოციურობა, სათქმელის ცხადად და ლაკონურად გადმოცემის უნარი გამოარჩევს თქვენი მინიატურებისა და ჩანახატების წიგნს „უფროსი ჩიტებს“, რომლებშიც სრულად წარმოჩინდა თქვენი პოეტური ბუნება, რომანტიკულობა, ადამიანის სულში მხოლოდ სიკეთისა და სათნოების ძიების დაუოკებელი სურვილი, ემოციურობა...

თქვენი მწერლური ცხოვრების მთავარ წიგნად კი „წვიმის ქალი“ იქცა მოთხრობების, ნოველების, პუბლიცისტური წერილებისა და ჩანახატების კრებული, რომელშიც დამაჯერებლად, მწერლური სიმართლით აისახა ჩვენი გუშინდელი დღეების ტრაგიზმითა და კატაკლიზმებით სავსე ყოფა, ყოფა იმ ქვეყნისა, რომელმაც დამოუკიდებლობა კი მოიპოვა, მაგრამ ამ ბრძოლას მთელი ძალა და ენერჯია ისე შეაღწია, რომ კინაღამ ემსხვერპლა გავრეშებული, პირსისხლიანი მტრების შემოსევას.

არაერთი ლექსის, თეატრალური რეცენზიისა თუ ლიტერატურულ-კრიტიკული წერილის ავტორი ხართ.

ათწლეულები ენეოდიო ნაყოფიერ საზგადოებრივ მოღვაწეობას: მუშაობდით საბავშვო ბაღში პედაგოგად, ჟურნალ „პრეს-პრემიერის“ ლიტმუშაკად, გაზეთ „262“-ის კორესპონდენტად, ლექტორად სხვადასხვა უმაღლეს სასწავლებელში, სადაც რადიოჟურნალისტიკის საფუძვლებს ასწავლიდით სტუდენტებს.

და მაინც, ცალკე აღნიშვნის ღირსია თქვენი მრავალწლიანი საქმიანობა საქართველოს ტელერადიომაუწყებლობაში, სადაც რადიოს „ოქროს ფონდის“ მკვლევარ-რედაქტორი იყავით და ყველაფერს აკეთებდით საიმისოდ, რათა ისეთი დიდი ქართველების ხმა, როგორიც იყვნენ აკაკი წერეთელი, ვანო სარაჯიშვილი, ივანე ჯავახიშვილი, კორნელი კეკელიძე, გალაკტიონ ტაბიძე, გიორგი ლეონიძე, გრიგოლ რობაქიძე, კონსტანტინე გამსახურდია, ექვთიმე თაყაიშვილი, სხვანი და სხვანი ჩვენი ყოფის, ჩვენი არსებობის თანამდევნი სულები ყოფილიყვნენ. ამიტომაც გვესახებით ქართული კულტურის უანგარო მოღვაწედ. თქვენ ხომ თითქმის შეუძლებელი შესძელით და, ფაქტობრივად, შიშველი ხელებით მოახერხეთ უნიკალური წიგნის „საუკუნის ხმების“ გამოცემა, რაც საყოველთაო პატივისცემით განაწყობს თქვენდამი ყველას, ვისთვისაც ძვირფასია ქართული სულიერების, ქართული გენის ნებისმიერი გამოვლინება. სწორედ ამიტომაც სრულიად დამსახურებულად მოგენიჭათ დავით აღმაშენებლისა და ნიკო ნიკოლაძის სახელობის პრემიები.

ქალბატონო ნუნუ!

კიდევ ერთხელ ღრმა პატივისცემით გილოცავთ საიუბილეო თარიღს ქართული ლიტერატურისა და ხელოვნების მოამაგე ქალბატონს, გისურვებთ დიდხანს სიცოცხლეს, ჯანმრთელობას და წარმატებებს თქვენს საქმიანობაში.

საქართველოს მწერალთა კავშირი



რეზო ნატყებია 75

75 წლისა შესრულდა გამოჩენილი ქართველი მწერალი და საზოგადო მოღვაწე რეზო ნიკოლოზის ძე ნატყებია. ამის გამო საქართველოს მწერალთა კავშირმა იუბილარს მისალმება გაუგზავნა. მისალმებაში ნათქვამია:

ჩვენო ძვირფასო ბატონო რეზო!

საქართველოს მწერალთა კავშირი, თქვენი მეგობარი ქართველი მწერლები გულმხურვალედ მოგესალმებიან დიდებულ პროზაიკოსს, პიროვნებას, მამულიშვილს და გილოცავენ დიდმნიშვნელოვან თარიღს თქვენს ცხოვრებაში - დაბადების 75 და ლიტერატურულ-შემოქმედებითი მოღვაწეობის 50 წლისთავს.

თქვენი სამწერლო კურთხევა 1974 წელს შედგა, როდესაც ჟურნალ „ცისკრის“ დამატება „ნობათში“ პირველი მოთხრობები დაბეჭდეთ. დებიუტი ფეხბენიერი გამოდგა და ქართულ სალიტერატურო სამყაროს ახალი ნიჭიერი მწერლის დაბადება ამცნო. მას შემდეგ თქვენი ნაწარმოებები პერიოდულად ქვეყნდება ჩვენს პერიოდიკაში, გამოდის ცალკე წიგნებად.

ქართველი მკითხველი მუდამ ცხოველი ინტერესით ხვდება თქვენს პუბლიკაციებს.

თქვენი რომანები, ისეთები, როგორცაა „ჯუჯა ალვის ხეები“, „მეზობელი ციციარი“, „სადგურიდან სადგურამდე“, „ჩვილის სიზმრები“, „რობიზო“, მოთხრობებისა და ნოველების კრებულები „ცეცხლის კაცუნების დღესასწაული“, „პორტრეტები“ თქვენი ნიჭიერებისა და სახეობრივი აზროვნების მშვენიერი დასტურია. ამ ნაწარმოებებს ხომ დიდი ადამიანური ვნებანი და ტკივილები, დახვეწილი იუმორი გამოარჩევს, რაც მხოლოდ ჭეშმარიტ შემოქმედთ ხელენიფებათ. ტიპებისა და ხასიათების მონუმენტური ძერწვის აღიარებული ოსტატი ხართ, რაც ნამდვილი მწერლობის თანამდევნი ნიშან-თვისებაა. ცალკე აღნიშვნის ღირსია თქვენი დოკუმენტური მოთხრობები, რომლებშიც სიყვარულით ხატავთ ქართული მწერლობის კორიფეების ირაკლი აბაშიძის, ოტია იოსელიანის, რეზო ჭეიშვილის, ოთარ მამფორიას მონოლითურ სახეებს.

თქვენი პიესები „სახლი ღრუბლებში“, „მატარებელი ხუთ წუთში გავა“, „დათიკოს გამოსვენება“ წარმატებით იდგმებოდა ქართული თეატრის სცენაზე.


წლების განმავლობაში მუშაობდით საქართველოს მწერალთა კავშირის ქუთაისის განყოფილების რეფერენტად, ქუთაისის კულტურის ცენტრის დირექტორად, ქუთაისის მერიის ეკონომიკისა და ბიზნესის დეპარტამენტის თავმჯდომარედ, ქუთაისის პრესის სახლის დირექტორად და ყველგან პროფესიონალიზმითა და პრინციპულობით, სათნოებითა და მოყვასის სიყვარულით გამოიჩინებდით.

თქვენი მრავალწლიანი უაღრესად ნაყოფიერი მოღვაწეობა ილია ჭავჭავაძისა და ნიკოლოზი თქიფანიძის სახელობის პრემიებით აღინიშნა.

ბატონო რეზო!

კიდევ ერთხელ სიყვარულით გილოცავთ საიუბილეო თარიღს ჩვენს ძვირფას ძმასა და მეგობარს, დიდხანს სიცოცხლეს, ჯანმრთელობას და ახალი შემოქმედებითი მწვერვალების დაპყრობას გისურვებთ.


საქართველოს მწერალთა კავშირი



"საგურამოს" პრემიის სერით ილია ფონდმა და საგურამოს ილიას სახლ-მუზეუმმა გამოსცეს სოსო სიგუას ლიტერატურულ - კულტუროლოგიური ნაწარმების ანთომეულის პირველი ტომი - "კულტუროლოგიის საფუძვლები", 770 გვ.

სერიის მთავარი რედაქტორია ილიას სახლ-მუზეუმის დირექტორი ანდრო ბედუკაძე.

დაბეჭდა გამომცემლობა "საარმა"/ დირექტორი ლევან თითმერია/.



თემურ შავლაძე

თანამედროვე ქართულმა მწერლობამ მტკივნეული დანაკლისი განიცადა.

ქართველ მწერალთა რიგებს გამოაკლდა ნიჭიერებითა და მწერლური პატიოსნებით გამორჩეული შემოქმედი, რომელიც მუდამ ერთგულად და მუხლჩაუხრელად ემსახურებოდა ქართული მწერლობის წინსვლასა და განვითარებას.

თემურ შავლაძე დაიბადა 1950 წლის 3 მაისს თბილისში. საშუალო განათლების მიღების შემდეგ, 1967 წელს, ჩაირიცხა თბილისის სახელმწიფო უნივერსიტეტის ფილოლოგიის ფაკულტეტზე, რომელიც დაასრულა 1972 წელს.

ქართველი მკითხველი ცხოველი ინტერესით ეცნობოდა შემოქმედის ისეთ პოეტურ კრებულებს, როგორცაა „მთვარის ზამბახები“, „ბედის სიმები“, „რად აქვს გულს ესე ჩუმი ნალველი“, „შავრადოვანი“. ეს ინტერესი არ იყო შემთხვევითი. ამ კრებულებიდან ხომ მათ სამშობლოს ბედსა თუ უბედობაზე ღრმად დაფიქრებული შემოქმედი ესაუბრებო-

და, რომელმაც ქართულ სააზროვნო მეტყველებისათვის სრულიად ახალი პოეტურ-სამყაროეული სივრცე გააჩინა, ორიგინალური მსოფლმხედველობითა გინა მსოფლგანცდით რომ გამოირჩეოდა. ამ კრებულებში შესული ლექსები ფიქრით, აზრით, მეტყველებით ახალ სიტყვას წარმოადგენდა ქართულ პოეზიაში, რასაც თან პოეტის ნიჭიერებაც აქვითკირებდა.

თემურ შავლაძე ავტორი იყო მეტად საინტერესო წიგნისა „პოეზია- მეოთხე განზომილება“, რომელშიც შევიდა მისი ესსეები, ლიტერატურულ-კრიტიკული წერილები, პოლემიკური და პუბლიცისტური სტატიები. მანვე შეადგინა და ცალკე წიგნად გამოსცა ქართული ისტორიული მოთხრობების კრებული.

თემურ შავლაძის წიგნის „რად აქვს გულს ესე ჩუმი ნალველი“ მიხედვით ვერიკო ანჯაფარიძის სახელობის ერთი მსახიობის თეატრში 1996-2002 წლებში იდგმებოდა სპექტაკლი „ხმა იდუმალი“.

სულიერი არისტოკრატიზმი, დახვეწილი ინტელიგენტურობა გამოარჩევდა მუდამ ამ შესანიშნავ შემოქმედს, რომელთანაც მეგობრობა და ახლო ურთიერთობა პატივი იყო თითოეული ჩვენგანისთვის, ამიტომაც გვტკივა ასე მისი მოულოდნელი აღსასრული.

ქართველ მწერლებს დიდხანს ემახსოვრებათ თემურ შავლაძე - მწერალი, მოღვაწე, ერისკაცი, რომელმაც ღრმა კვალი დაამჩნია XX-XXI საუკუნეების ქართულ პოეზიას.

საქართველოს მწერალთა კავშირი

მამა იოანე

დედაჩემს

შენ მომანიჭე ცხოვრების ძალა, ჩემში შთაბერე სული უმანკო, ყველაზე მეტად შენ უწყი სწორედ რომ არვინ არის ქვეყნად უნაკლო. ჩემში ხედავდი მომავლის სხივებს და ფიქრს ანდობდი ღამეს მთვარიანს, სადაც არ უნდა წავიდე მუდამ მე მხოლოდ შენკენ მომიხარია. ახლა სიბერემ შემოგიტია და ხშირად მხვდები თვალცრემლიანი, არ მაინცყდება წარსული წლები არ მაინცყდება გზა ეკლიანი. დღემდე მივსტირი ბავშვობას ჩემსას და გულში ცეცხლი მინთია ჯერაც დედაშვილობას არ აქვს საზღვარი ამ სასწაულით ვცხოვრობ და მჯერა.

ტრისტან გეგენავა

ღავითი მოდის

ცა არის სუფთა, არც თოვს და არც წვიმს, ჩემი მამული - ნუხილი გულთა, დუმს განაბული. და უცებ თვალწინ, მწვერვალზე მთების ციდან ეშვება დიდი ნათელი. ენუგეშება გულებს გათელილს ვარდის ფურცლების კორიანტელი. გაშლილი ფრთებით ჩამოგავს არწივს, სახე აქვს კაცის და მზერა მკაცრი. ვერავინ უშლის და ხარობს ამით. მადლობა უფალს! ამ სასწაულში მე ვხედავ დავითს. დიდება დავითს! ჩვენი წარსული ვინაც ქართული ნათლით მოჰფინა, ნიკოფსიიდან დარუბანდამდე მტერი არ დარჩა ცრუ და ორპირა. ან გარდასული, გმირად წასული, ვით სასწაული ჩვენსკენ მოფრინავს. როგორ ელვარებს მისი მახვილი, მისი ხმალი და მისი ფარაჯა, მისი ქადილი ზღვაა მღელვარე, შემართულია მისი დამბარა. სხვა გზა არა ჩანს! თავისუფლების, ერთიანობის დგება დარაჯად. ქართველნი, სწორდით! დავითი მოდის! დავითი მოდის! ერი გადარჩა!

აკაკი ბიძინაშვილი

მგონი, გადვურჩით!

ესეც ევროპა, ესეც ევროპა! ძმით შევეფიცეთ, აზრით შევერთდით... ქართული ყანა რუსმა ვერ მომკა, მასთან ბრძოლაში, არ ვართ ჩვენ ერთი...

დიდი იმედით, დიდი ნუგეშით, ვიცე, ჩაცხრება, ძმათა ომები. გაიზრდებიან მშობლის ბუდეში არწივები და ხვადი ლომები... კვლავ ვიამყებთ ჩვენი ხვალის დღით, ისევე იფეთქებს წყარო ამურის, იმ გამარჯვებებს ვერვინ დაითვლის, კავკასიონის მთებს რომ გადუვლის.

არ მიგტვატოვებს ომში არავინ, ქარი ნაიღებს სხვათა ბრძანებას. ძმობა, ერთობა დაუფარავი, მშვიდობის დროში აფრიალდება.

ისევე მაღალი ღმერთის იმედით, მოვა სიმშვიდე ამ ჩვენს მამულში, გამარჯვებათა კარზე მივედით, დათვს და გველეშაპს, მგონი, გადვურჩით!

მაია კახიძე

ის ჩემი გულია...

რა იყო ის ღამე ფეხზე რომ გათენდა, როგორი ფარსია ეგ თქვენი ღიმილი, ის ღამე იმ დილას ან რატომ დანებდა, სიგიჟე მოვარდა, რამხელა ტკივილი. წარსული წავშალე, ჩამქრალი იმედი, ღირვით უნდოა მზერა და თვალები, ნეკნიდან წასული პარტერში ჩავედი, ცხოვრების ფიესტა... შავია ფარდები. მე სულ არ მჭირდება ღიმილი ქარცია, ეგ ცუდი პიესა ჩამოხსნეს თქვენსავით, სხვადასხვა დემონის სამოსი გაცვიათ, ბროლები ისეთი, დამწვარი მზესავით. მიცანით?-ისა ვარ, გული რომ მოუკლეს, რა იყო ის ღამე, სულდარდის ფერება, მეფეო, მე გეტყვი: ცოდვანი აგიკლებს, კონდაკი დაშალა შეშლილის ხელებმა. ეს ჩემი გულია ასე რომ ფრიალებს...

მედიკო ჯაიანი

რა ტკბილია, რა თბილია ჩემი დედულ-მამული, დამაჭრული შემოდგომით, დაპეპილილი ზაფხულით, მაფშალით, ოჩოკოჩით, სიმღერებით ხალხურით, სევდიანი ისტორიით, ბოხოქარი ეგურით, „სისა ტურას“ შეძახილით, ტკბილზე ტკბილი ქართულით, ხვიჩა-ხვიჩა მურუცხებით, ტყაშმაფებით მზაკერულით, უძველესი კოლხთა მეფით, აიეტიტ განთქმულით, ზრდილობით და თავდაჭერით, მხიარული მაყრულით, სკვამი(ცირას)სიყვარულითთუთარელაღმით, ყვავილებზე სამკაულად შერჩენილი ნამით, მნახველის თვალს რომ იტაცებს ანდამატის ძალით, ღმერთო, მომეც იმის ნება დიდხანს დაეტკებ ამით! გავიგონო „ნანა სკუა“ თქმული ტკბილი მეგრულით, დიდმა საბამ რომ უნდა მგალობელთა ჟღერტული... აქ შრომობდა, აქ იბრძოდა ჩემი წინაპარი, ღმერთო, სული გაუნათლე, გადასწერე ჯვარი!

თამარ გოგიძე

ამ საღამოსაც უშენოდ თოვდა, უშენოდ სულ სხვა ფერი აქვს ფიფქებს, სხვაგვარი ფეთქვით გული ითხოვდა, მოგონებები ეხატა ფიქრებს. ამ საღამოსაც ზუზუნით ქარი ეხეთქებოდა გულის იარებს და მე ვდნებოდი, ვით დილის ცვარი, თითქოს ფიქრები გავიმზიანე... ვერ მიმხვდარიყვენ ფიფქები დარდებს, მეც არ შევიჩვილე, უშენოდ რას ვგრძნობ, არც ფიფქს და წვიმას, არც დღეს, არც ღამეს, მე შენით ტკივილს ისევე შენ განდობ...

ალბათ დილაზეც უშენოდ მოთოვს, ამ დროს სუნთქვაც კი უფრო რთულია, გული შენს სითბოს მე ისევე მომთხოვს, კვლავ დამნაშავე ჩემი გულია.

...დილასაც ისევე, უშენოდ თოვდა, სულ სხვა ელფერი დაჰკრავდა ფიფქებს...

საქართველოს მწერალთა კავშირი და „მწერლის გაზეთი“ მწუხარებით იუნყებთან, რომ გარდაიცვალა ქართველი მწერლის ვაჟა ჩორდელის და **გული მელაძე** და თანაუგრძნობენ განსვენებულის ოჯახს.



№1 150 ლაგო 1 იანვარი - 31 იანვარი 2024

მისამართი: ბაჩალიძის ქუჩა, №13 პოლია საბჭოელი, თბილ. 293-55-75 **გაზეთი გამომდის 2001 წლის 8 ნოემბრიდან**

მთავარი რედაქტორი **სარედაქციო საბჭოს თავმჯდომარე პასუხისმგებელი მდივანი**

სოსო სიგუა **რედაქციის მდივანი მანანა გორგიშვილი**

რეგისტრირებულია ვაკე-საბურთალოს სასამართლოს მიერ. რეგისტრაციის № 5ა-4-3098 e-mail: mgorgishvili@mail.ru; sososigua@yahoo.com



9 771987 698009